

እብ መዓወነት ኤረትሮፕ ወፊንላንድ ሰሚናር ሕበር ገብእ

ኤረትሮፕ ወፊንላንድ፡ እት ተዐሊም ውቁል ወድያህ ለህለዩ፡ ዲብ ቴክኖሎጂ ሐብሬ ወእትሳላት ለረከብት መዓወነት ወሄራረ ለቀይም ልቃእ፡ ዮም 12 ማርሰ እት ሆቴል አስመረ ፓላስ ገብእ።

ወዚር ተዐሊም አሰይድ ሰመሬ ርእሶም ዲብ አስምዐዩ ከሊመት፡ ዲብ ወርሕ ኖቨምበር 2015 እብ ትብገሰት መዓወነት፡ እብ መጅብ ለትረከብ ተጃርብ፡ ወክሱብ ለህለ አምር ቀዩሞት፡ ለእግል ልትባእሕ ለልትሐዜ ሀደፍ እግል ልትሐቀቅ ለሰዔ ክምቱ ሸርሐ።

ሙዲር ተንፊዚ ወጠንያይ መዐሐድ ተዐሊም ውብሐሰ ዶክተር ሀይሌ ምሕጹን እብ ጀሀቱ፡ ምስል ፊንላንድ ትገብእ ለህሌት መዓወነት ወሄራረ፡

ትአምርተ አማነት ክልኤ ለጀሀት ክም ተ እንዴ ሐበረ፡ እሊ ፍንጌ ኩልያት ዐድነ ወጃምዓት ፊንላንድ ለገብአት ዲብ ቴክኖሎጂ ሐብሬ ወእትሳላት ለረከብት ሰዓይት፡ ዲብ አስነዮት ኑዕየትላ ልትሀዩብ ተዐሊም፡ ከደማት መክተባት፡ አደቀቦት በቃዐት ተድሪስ ውብሐሱ፡ ለለአትናይት ፍሬ ክም ትረከብ ምኑ አብረሀ።

“ምስል ኤረትሮፕ ለትገብእ መዓወነት ዐማር ፍገራት ተሀይብ” እንዴ ቤለ ነፈር መጅልስ ፊንላንድ ሚስተር ፔካ ሃቪሶት እብ ጀቱ፡ ምስል ዲብ ጠወሮት መቅደረት ለለአምን ዐገል ዐማር ኤረትሮፕ ለገይስ ክምቱ ሐበረ።

ምን ውዛረት ሕስር ካርጅየት ፊንላንድ ሰፊረት ታርጃ ፈርናንደዝ ህዩ ለቀደም እለ ዲብ



መሻርዕ ለገብአ በርናምጅ ፍገራቱ ለትትሐመድ ክምቱ፡ እብ ደረጀት መስኡሊን ውቁላም ልግባእ ወደረሰ ገብእ ለህለ ዝያራት ተዐቤ ለህሌት ዕላቀት ለለአክድ ክምቱ አፍሀመት።

እት መናሰበት፡ ለትሰርገለ



መሻርዕ ወሄራሩ ለክስሰ ሸርሕ ትቀደመ።

ዲብ ወጠንያይ መዐሀድ ተዐሊም ውቁል ውብሐሰ ሙዲር እዳረት ተዐሊም ውቁል ወእድንያይ ዕላቃት ፕሮፌሰር ዘመንፈሰ ጽጌ ህዩ፡ ለመሻርዕ

ወሀደፉ እብ ክስሰ እግል ኤሪነ እት ሀበዩ ተውድሕ፡ በራምጅ ሸራክት ቴክኖሎጂ ተዐሊም እንዴ ጠወረ፡ ዐመልየት ደሪስ ወእድረሶት እብ ቀለት ገበይ ለልትሰርገል እብ አርድየት እግል አጥፍሐት ለአመመ ክምቱ ሸርሐ።

ከረን፡ አርዛቅ ሰያሐት ለክስሰ መሓደራት ልትሀዩብ



ፈርዕ ድራሳት ወመታብዐት አርዛቅ ሰያሐት አቅሊም ዐንሰቤ፡ እግል ደረሰ ካልኣይት ደረጀት

መዲነት ከረን፡ ሕፍዘት አርዛቅ ሰያሐት ለክስሰ መሓደራት ዝመ።

ለመሓደራት፡ ፈዛዐት ወፊህም ደረሰ ዲብ አርዛቅ ሰያሐት እንዴ ዐቤ፡ ዲብ ሕፍዘቱ ዶር ሚርሓይ

እግል ልቀድሞ፡ እትክምስልሁመ ዲብ ተዐሊም ውቁል ክም መጃል እግል ልሕረው ወእግል ልትሸቄ እብ ለአመማ ቱ።

ሕፍዘት ወራዐየት አርዛቅ ሰያሐት እግል ሐቱ ጀሀት ለኢተርፍ፡ መስኡልየት ክሉ ሙጅተማዕ ክምቱ እንዴ ሐበረ፡ መስኡሊ ፈርዕ አሰይድ ፍሰሃ ሃብቱ፡ እብ ደረጀት ወጠን አህምየት ሰያሐት ለቡ አካናት ብዙሕ ክም ሀለ እንዴ ሐበረ፡ ቀሓይቶ፡ መጠረ፡ ከስክሴ፡ በለው ከለው፡ ቡያ፡ አዱሊስ፡ ሰምበል፡ ማይ መተናይ፡ ወማይጭሆት ክም መሰል እንዴ ዘክረ፡ ለህለ ዲብን አሳር ወአህምየት ለክስሰ ተወድሕ ሀቤ።

ኤረትሮፕ ዲብ ረአሰለ እት ግንራራብ በሐር ቀያሕ ለባቱ መካሪት ስትራተጂ፡ ሓለት ጀው

ውጢት፡ እብ ጠቢዐት ውብዝሐ መክሉቅ፡ ወአሳር ገዲም ርዝቅት ክም ተ፡ እብ መሰል ለትተለ ሸርሕ እንዴ ቀደመ አሰይድ ፍሰሃ፡ ዲብ ሚነት ገዲመት አዱሊስ ገብእ ለህለ ሐፊር ወልትረክብ ለህለ አሳር፡ እትክምስልሁመ ዲብ ቡየ ለትረከብ ሀይክል እሊ ለለአክድ ክምቱ አፍሀመ።

መስኡል ፈርዕ ድራሰት ወመታዐት አርዛቅ ሰያሐት አቅሊም ዐንሰብ አሰይድ ፍሰሃ ሃብቱ እት ደንጎቤ መባሂ ገዲም መዲነት አስመረ ዲብ ሰጅል እድያይ ሚራሰ አቲሁ መሳልሕ ዐቢ ምንመ ቡ፡ መጦሩ መስኡልየት ክብድት ክም ለአረፍዐን እንዴ ሐበረ፡ ለህለ እን አሳር ገዲም አሰክ ሕድ ለሽብህ በክት ረክብ፡ መታብዐት ወመራቀበት ናይለ ክስሰ ጅሃት ወመዋጥኒን ክም ለአትሐዜ ሸርሐ።

ሳው፡ ሰሚናር እብ መናሰበት ሰማን ማርሰ ገብእ

ዐዋዲ ዴረት ወአፍካር ድንጉር እብ ፈዛዐት ዲብ ልትጋባህ እት ለህለ ኢነት፡ አንሳት መሻረከተን ዲብ ተዐሊም እግል ለዓብዩ ወመትጃግረት እንዴ ገብእየ ወመትጃግረት እንዴ ገብእየ አስክለ ትወቀለት ደረጀት እግል ብጽሐት ጅሀደን እግል ለአደቅቤ፡ እት ሳው እት ገብእ ሰሚናር መትፋቀዲ ትቀደመ።

መስኡል ቀድያት ሰያሰት ወተንዚም ማሕበር ወጠን አዋልድ አንሳት ኤረትሮፕ ሚጀር ትዕቤ፡ ዲብ እብ መናሰበት እድንያይት አምዕል አዋልድ አንሳት ለወዴቱ ዶር ወመሻረከት አንሳት እት ዐማር ለክስሰ ሰሚናር፡ ፈድላ እብ

ሕኩመት ወሸዐብ ገብእ ለህለ ጅሀድ፡ መሻረከት አንሳት ዲብ ተዐሊም፡ ሸቅል፡ ሰልጠት ሰያሰት፡ እትክምስልሁመ ወራታት ዐማር ለለአትናይት ምናተ ለኢፈግዕ ተቅዩር ተአርኤ ክም ህሌት እንዴ ሐበረት፡ ዲብ ልትሐዜ ሀደፍ እግል ልትባእሕ እብ ትወቀለት እግል ልትከደም አትፋቀደት።

ሕኩመት ኤረትሮፕ መሻረከት ወሕቁቅ አንሳት እብ ዋጅብ እንዴ ፈሀመት፡ ዲብ ክሉ መጃላት እብ ትሳዌት ገበይ እግል ልሻርክ አርድየት እጥፍሕት ክም ህሌት እንዴ ሐበረት፡ ሚጀር ትዕቤ፡ እግል አደቀቦቱ ወአድመናት እብ

ደረጀት መአሰሳት ወአፍራድ እብ ተአሰትህል እግል ልትከደም እንዴ ትሳኬት፡ ዲብ ገሌ አካናት ሸቅል ልትዳሌ ለህለ መውዐሊ አጀኒት መሻረከተን ወዶረን ለለአትናይት ሰበት ቱ፡ እብ ፈይሐት እግል ልትተሌ ትፋኔት።

ቃእድ መርከዝ ተእሂል ክድመት ወጠን ኮሎኔል ደበሳይ ግዴ እብ ጀሀቱ፡ አቀደቦት መቅደረት አንሳት ክል ጅሀት ሙጅተማዕ ክም ክስሰ እንዴ ሐበረ፡ አንሳት ለጸንሐ አፍካር እግል ልበድላ እብ ሸቅል ወተዐሊም እግል ልትቀደመ ወመሰል ስኔት እግል ልግባእ

መዓወነት ክሉ ክም ተአትሐዜ አተብተ።

እብ መናሰበት እድንያይት አምዕል አንሳት፡ ምን ዮም 6

አስክ 8 ማርሰ እት ሳው ለገብአ በርናምጅ እብላ ትፈናተ በራምጅ ፈን ወርያደት ለትተለ ክም ዐለ ወኪል ኤሪነ ሐበረ።



ከሊመት ወዘር እዕላም እት ወዕለ ኤረትሮፕ ሐዳስ



ሓይላም ወሐይሳት፡ እስልፍ አሰናይ እትሊ መሕበር-ጎማት ገጽ ሕድ ገብአኑ።

ለሐልፈ ተጃርብ ምን ቁሪናሁ እንዴ ቀየምኩም፡ እግል ተጠውር ጀሪደት ኤረትሮፕ ሐዳስ ለገብእ አፍካር ሃይላም ክም ህሌኩም ዳምን አኑ። ውዛረት እዕላም፡ እሊ እንቱም ለሀብኩሙ ፊናታት እብ አፍካሩ እት መዓል እግል ተአውዕሉ፡ ናይ ማል ወማደት አርዛቀ እንዴ ከሰአት፡ እግል ትሸቄ እቡ ዱሊት ክም ተ እግል አክድ እኩም እፈቱ።

አሸቃል እዕላም እግል ሽዑብ ለልሀይቡ ክዳማት መትክእ ሰበት ቱ። ዝያድ ለገብእ አሸቃል ብዕድ አትሐዳስ ወተቅደም ለአትሐዝዩ። ፈርያት እዕላም፡ ታሪክኑ፡ ሕሸሞታትኑ፡ ስያሰት ዐማር ወዐዳለት እጅትማዕየት ሕክሙት፡ ክምሰልሁመ ረአይ ወሞሙሓት ሽዑብ ለልትሐደር ምሕል ጎማት ሰበት ቱ፡ አትሐዝዩቱ ዐቢ ቱ።

ወሳእል እዕላም እት ቀበት አብያትን እንዴ አቱ፡ ምስል ጼዋን ለነአምሐብሩ ወቅት ሕሩይ (Prime time) ምኑ ለነዘዕ ወለንትሃጌ እቡ አርእስ ለተማትም

ወእት ልትጫፈር ለልአቴ'ነ (Intrusive) ፈርያት ቱ። እለ ምን ገብእ፡ እት አስሐባብ ናይለ ለሀርሱ መዋዳዕ፡ ጨርት ናይለ ለሓልፋ ልእኩታት፡ ጅድድን ናይለ ለሀርሱ ቅደይ ወአህምዩቱ ዲብለ እብ መጅብ ምህነት፡ ዓማር፡ አሰል ወጠበቃት መጅተመዕ ለትካፈለው ቁርአቱ አው መታብዐቱ ሰበት ቡ፡ ምን ቁሪናሁ እግል ልትቀየም ወጅቡ። እምበል እሊመ ፈርያት ወምህነት ሰሓፈት ናይ አምር-ክቱብ ጠባዩዕ ሰበት ብእቱ፡ እት ሸክል ቀደሞቱ፡ ነዳፈት ህግያሁ፡ አትጋራሙ ወዕድ ለጡሙ ሕሰር ለልሐዜነ ጋር ቱ።

ውዛረት እዕላም ቀደም እላመ በራምጅ እግል ተአሰኔ ጌማም ትወዴ ጸንሐት። ለእንቀይሙ በራምጅ እት ሰለሰ ታክያት በጥር። ህቶም ህዬ፦

1. ናይ ክርስ መራቀበት በራምጅ
2. ናይ መታብዐት በራምጅ መራቀበት ዓ'መት
3. ክም እሊ ናይ ዮም ምዕል ወዕሉ፡ ምስል ፍንቱያም ሰብ መቅደረት ለገብእ ጌማም ሸቅል።

ክእነ ለመስሎ መጠውረት ላቶም ጌማማት ህዬ መናሰባት 10፡ 20 አው 25 ሰነት እንዴ ኢልታኸው፡ ክል-ዶል ወቅቶም (Periodicity) እት ለዐቅቦ እግል ኒደዮም ወጅቡ። ለወዴኩሙ ተቅዩም እት ዓም አግጹት፡ ሰፋዮት ህግዩ ወዐዋሚድ ሌጠ እንዴ ኢልትከለብ፡ እግል ብዕድ ሸክክ እዳረትመ ትምቱም እግል ለሀሌ ሰእየት እወዴ።

ጀሪደት ኤረትሮፕ ሐዳስ እትሊ ወክድ ጎነ ምን 3000 ሐበት ለኢዘይደ ትጠቤዕ ህሌት። ክምለ ብዕድ ወሳእል እዕላም ህዬ፡ እት ሸበክት ሻባይት አትየት ሰበት ተ፡ ምስል ብዝሐ ቁርአተ አክል አዩ እግል ትወስክ ወዲብ ሙስተቅበል ሚ ተጠውራት እግል ቲዴ ክም ወጅቡ፡ ክምሰልሁመ እት'ለ መሕበራይ እዕላም (Social media) እት ወሴዕ መጽእ እት ለሀለ መደት፡ ናይ ሙስተቅበል ሸክለ ምን አዜ እግል ልትገነሕ



ለቡ ጋር ቱ። እሊ ናይ ዮም ወዕለ ጀሪደት ኤረትሮፕ ሐዳስ ህዬ፡ አተላላይ ለቡ ወእት

ዐቅቶል ጀሪደት ለዋሌ እግል ልግበእ እስኤ ወእትፋኔ። ወሹክረን!



ቅ/በ/ቀየሕ ዝያድ ነጀሕ ለአርአዩ አንሳት ጀዋእዝ ልትህየበ

ማሕበር ወጠን አዋልድ አንሳት ኤረትሮፕ አቅሊም ቅብለት በሐር ቀያሕ፡ ክም አተላላይ ናይለ አንሳት እንዴ ደርሰዩ ወምህነት እንዴ ከሰበዩ ረሐን እግል ልቀደረ ለወድዩ ጅህድ፡ ዲብ ተዐለም አካዳሚ ንቃዋ ውቁል ለአምጽአዩ ወእበ ከሰባሁ ምህነት ለትዐወተዩ 46 አንሳት ጀዋእዝ ሀበ።

እት እት መዲነት ባዴዕ ለገብአት ዓደት፡ መስኡለትለ ፈርዕ አሰይደ ጅምዐ ራኪ፡ አንሳት እብ እቅትሳድ ረሐን እግል ልቀደረ

ለትትህየብ ሰልፈት፡ አትፋዝያት ድድ ዐዋዲ ዲረት፡ መሻረከትን ወመጃገረትን ዲብ ተዐለም እግል ትደቀብ ወሕቁቅ አንሳት እግል ልትአክድ፡ ከዲም ምን አግደ አህዳፍ ማሕበር ክምቱ እንዴ ሐበረት፡ ምህነት እንዴ ከሰበዩ ዲብ ተሻሸት ወወራታት ሐርስ እግል ሸቅዩ አንሳት ሰዳይት ትገብእ ክም ህሌት ሐበረት።

እምበል እሊ፡ ማሕበር፡ እግል ደረሰ ሕገዛት እብ መሻክል እቅትሳድ እግል ኢልትዐንቀፈ ዲብ ልትሐዜ ሀደፍ እግል

ልብጽሐ ሰዳይት ክም ወዴ፡ እግል ደረሰ ፈዳብያትመ ጀዋእዝ እት ለሀይብ ክም ለአትናይት እንዴ ሐበረት፡ ክም ፍገራቱ መሻረከት ዲብ ተዐለም ዲብ ተአትናይት ደረጃት ክም ህሌት አብርሀት።

ለጅዋእዝ ለነሰአዩ አንሳት ዲብ ሀበያሁ ረአይ፡ ለገብእ እግልን አትናይት ትአምርተ ናይለ አንሳት ዲብ ክሉ መጃላት ለለአደምዐ እግል ልግብእ ለአመመ በራምጅ ክም ቱ እንዴ ሸርሐዩ፡ አህዳፍ ማሕበር እግል ልትሐቀቀ ክም ከድመ አከደዩ።

ኤረትሮፕ ወሕዳክ

ክል አርቡዕ ለትጠ'በዕ ጀሪደት

መዳልያይ፡

መሐመድ እድሪስ መሐመድ

ናይብ መዳልያይ፡

አድም ሳልሕ (አቡሐሪሽ)

ለይ-አውት፡

ፋጥና አደም

ዘሀረ ዐሊ

ተለፎን፡ 121797

ፋክስ፡ 127749፡ ዕ.ሰ.ቡ፡ 247

ተውዝዕ ጀሪደት፡

ተለፎን፡ 200454

አትአመሮት፡

ተለፎን፡ 125013፡ ዕ.ሰ.ቡ፡ 1284

ለእግል ጩዋይት ሳደፈት በናተ ዲኢኮን፤ ለጽምርት እተ ዐለት ፈረጃመ ለምሽዊት ኢሰረተ። ክምሰል መርዓት ሐዳሰ ህዩ ሕንቃቄ ኢረኤት ወሕዳሌ። ሕንቃቄ ወሕዳሌዲ ልትረፈ። እት ህሙም ወሽቀላት እንዲ ትካፊት ብለዕ ኢኮን ወሰታይ ገርብ ቀሽባይ ይቡሰ ገብአ። ህተ ሽፍር ክምሰል ኦቲት ጩዋይት አጀኒተ ተረግ እንዲ አበለት ሽፍር ሰበት ጠለቀት አርወሐተ ክምሰል እሲት ሰባቢት ዐለበተ። እት ጎማም ወሽቀላት እንዲ ትካፊት ህዩ፤ ዲመ እስትንተን ወጎማም ገብአት።

ሳልሕ ላቱ ለድርሆይ ገመሉ እንዲ መስከ እት ሓዚህ ሳርዳይት ነፊሰ ሌጠ ትወከለ። እት ገበዩ ህዩ “ውላድ ሰብ እሲት ሚ ረኤኩም?” ልብሎም እት ህለ። ህቶም ህዩ፤ እንዲ አትሐተፈ ልብሎምቱ ለህለ መሰሎም ዐለ። እግልሚ፤ ዲብለ ደዋይሕ ንዋይ በደ ምንዩ እት ልትበህል ዲኢኮን፤ አዳም በደ ምንዩ ሳምዓም ሰበት ኢለአምሮ፤ እብሊቱ ህዩ እግለ ሰኣሉ እብ ሰኣል በልሶ እቱ ለዐለው።

ሰርም ህዩ እበ ሰኣሉ ዲብ ልትፈከር፤ “ረቢ ልክረዐ ለሓላት እሌ፤ ህተ ለእሲት ምን አከይ ዐቅል ዑፊት ዐለት ማሚ? እሲት ውላደ ተረግ እንዲ አበለው ተሀርብ ሚተ?” እት ልብሎ ልሰኣሉ እት ህለው፤ ደሙ ፈሌሕ እቱ ዐለ። እግልሚ፤ መስኪነት ጩዋይት ሳክበት ውሓድረት እት እንተ እብ አዋልድ ወለድኪ ጸመር ሰበት ትጸመረት እተ፤ አርወሐተ ክምሰል ናቅሰት፤ ወበዐል ኢሴመ ሰበት ዐለበታ ቱ ምነ ሽፍር ብርጋጋይ ለገብአት።

መስኪናይ ሳልሕ እብ እዴ ኖሱ አኩ፤ ቀደም እለ ከደን ፋግር ሰበት ኢለአምር ክሉ ለቱለል ወለካይዱ ለዐለ በለድ ሐቲህ ቀው። ሳልሕ እምበል ፍሬተት ገርሀቱ ወሐሊብ ወአቱ ምን እለን ክልኤ በረ እንዲ ፈግረ ከእት አካን ብዕደት ምዩይ ወድሩር ኢለአምር። ሰበት እሊ ክለ ለእለ ወዴ ወባሰር ትቀዌት እቱ።

ሳልሕ ዲብ ገበዩ እብ ደሚሩ ግረ እንዲ አቅበለ ለአሰልፍ እብ ፈታህ ወሻመተ ምን አፋሁ ከርዩ ለይዐለ ወሐር እብ ሰብብ ኣነሶት አከይ መዓመለት ለተዓመለ ምስለ ጩዋይት አክለ ፈቅደ ሰኒ ወአማን ተዐሰ ወነድሙ። ትዕሰ ሳኪን ሴመ ሰበት ኢትበልሰ እሱፍ ወሕዩር ዲብ እንቱ እብ ክለ ለሓላቱ እት ጎማም ትካረ።

ጩዋይት ምነ ዶል ለምን ቤት ፈግረታተ ግረ ኢትወለበት። እንዲ በትኩት ሰበት ፈግረት ህዩ፤ አጀኒት ኢትወለበት ወመንበር።

ሰርቡብ ሳርዳይት

ደሚረ እበ መርሐዮተ ገራቢት ሌጠ ገጽ ቀደም ትሸወረት፤ አ’ተዩ ትገይሰ ክምሰል ህሌትመ ተአምር ይዐለት። ለዐልቀት ወለት ዋብ ወለተ ወለምዕባዩ ላተን ሰለሰ አዌልዳተ ክልዶል እት ገጸ ልትካዩለ እለ ምንመ ዐለዩ፤ እተን እንዲ ረሐመት ግረ ክምሰል ኢተአቀብል አርወሐተ አትአመነት።

ሳልሕ ፈዩግ ወራሐት ደሚር ሐቆ መቃንጽ ጩዋይት አካን ኢረክበ እሉ። ዲመ ገጹ ቅርጡን፤ ደሚሩ ርቡሽ፤ አርሐቱ ታልፈት ዲመ ዲብ ነድም ወለአሰተንትን ህዩ ለወክድ በክቱ ረግመ እቱ። እሲት ረኤኩም ህዩ ተአክዩ አለቡ። ምን ክሉ ለአኬት ህዩ እብ ክሉ ለአድሁይ አትሀደጊት ሰበት ገብአ፤ ህታመ ናዩ ምሽዊት ወዴት እቱ። ሳኪን ክለ ሰእዩቱ ዲብለ ሐጀ ነፊሰ (ሳርዳይት) ዋዲሁ ሰበት ዐለ፤ ሚዶል ገብእ እበጸሐ እት ልብልቱ ገጽ ቀደም ልትሀርቡብ ለዐለ።

ሳልሕ ዶል ዲብ ጀዋሚዕ ወዶልመ ዲብ ዐድ ህዳይ ዲብ ገይሰ ልሰኣል ወለአተንትን ምንመ ዐለ፤ እለ ረኤኮ ወእለ ሰዐኮ ለልብሉ ላተ ኢረክቡ። ደለ ትሰኣለዩ ህዩ ሕኔት ልብ ለሸፊ በሊሰ ለሀይቡ፤ እግል ሰኣሉ እብ ሰኣል ሌጠ በልሰ ዐለ።

መቃንጽ ጩዋይት ላተ ምንክር ገብአ። ተሐት ደፊት ሚ ለዐል አቅሎት ምክዶደ ኢትደሌት። እለ ህዩ ዝያደት እግል ደሚር ሳልሕ ሸውሸረት። እግልሚ አዳም እለ ኬደ፤ ለአለበ ሓላት ዲመ ለተአሰክብ ኢኮን። ህቱ ሌጠ እንዲ ኢገብእ ለአዌልዳቱ አክለ ረኣ ሰኒ ወአማን ገርቡ ልትካከእ፤ ዲደት አቡሁ ወእሙመ እግሉ ዝያደት ዲብ ሀለገት ካረዮሁ። ክሉ ለቱለል እግል ሳልሕ ሰኒ ይዐለ። እሊ ክሉ ኖሱ ሰበት ወደዩ ወ “እዴ ኖሰ ብርድት ቅርትተ ምንመ” ልትበህል እግሉ ላቱ ብርድት ቅርት ይዐለት። ሕፍን ወመራር ዐለት።

ሳልሕ እለ ክለ ገበይ ረያም እንዲ ካተረ ፈጅራተ ሱግ ቶከር አተ። ለከበር እት ክሉ ሰበት ትነሸረ ህዩ ምነ ህቱ ለሰኣሉ አዳም ብዕድ ለደግም እቡ በዝሐ። ሳልሕ ሰኒ ሸውሸር ዲብ እንቱ ለብጉሰ እግሉ ለዐለ ሓዚ እሲቱ እንክር እንዲ ከረ፤ አሰልፍ እብ ክሱሰ ሐጀ ነፊሰ እግል ልትሰኣል አሰተብደ። ደለ እት ገበይ ትከበተዩ ህዩ ልሰኣል ዐለ።

እት ለአተንትን ህዩ፤ እት ተገበዩ ዎሮ እናሰ ዐቢ ክም ትከበተዩ፤ ለእናሰ በዐል ረዩም ክምቱ ሰበት አግረሰ እግል ትካበረዩ። ለእናሰ ህዩ እግል ሳልሕ፤ “ እንተ መለሀይ ምን አውለት ትመሰል እጅ ህሌኩ አርድ ምኑ መጽኣከ ሰብኡ በኪት ወአሸራራቱ ኩሮዕ ማሚ? አዳም ወንዋይ ሚ መሰል ወአፍሓፊን ዛልምቱ ማሚ?” ወብዕድ ዲብ ልብል ጀርተም ልብል እቱ እት ህለ፤ ሳልሕ ላተ ሰኒ ማሸግ ወሕዩር ዲብ እንቱ ደለ ሐጫር ወብትክት በለሰ እግሉ ዐለ።

ሳልሕ ሐቆ እለ እግለ እናሰ “እትሊ ባካት ሐጀ ነፊሰ ለትትበህል እሲት እተዩ ተሀሌ ገብእ?” ዲብ ልብል ህቱመ እግለ እናሰ ዐቢ ሰኣል ወጀህ እቱ።

ለእናሰ ሰኒ ልወቅ ወፋሬሕ ዲብ እንቱ፤ “ሐጀ ነፊሰ ትቤ?”



ሃልካቱ?” ክምሰል ቤለዩ ሳልሕ ላተ ለምስጢር እግል ልድገሙ እግሉ ይሐዘ። “ጋረ ወዴኩ፤ እንታዲ ሐብረኒተ ምን ተአምረ” ዲብ ልብል ሰኣል ካልእ አትዐረዩ።

ለእናሰ ዲብ ዎሮ እግሩ እንዲ ዐቅለ እበ ዎሮ እግሩ ዲብ ቀሴ እግል ለሐብሩ ሐማሐመ ወሐር ዲብ ልትዋለብ ወእብ እዲሁ ለኣሸር፤ “ሐጀ ነፊሰ ለሴርዳይት እሲት ገብአት ምንገብእ ላተ፤ እሊ ለእሉ ጽብዋ ህሌከ ሻሬዕ ምኑ እንዲ ኢትሸክፍ አክሕሕድ እበ አሰክ ፖርሱዳን ለገይሰ ዐቢ ሻሬዕ እንዲ ጠዌኩ ሸንክት ግብለት ትጠዌ ወሐር ብዙሕ እንዲ ኢትገይሱ፤ ድገለብ እንዲ አደንገብክ ዎሮ ሐሽ ዐቢ እግል ልጸንሐካ ቱ። ዲቡ ለአዳም ኖሱ ለሐብረኩ ለሐሽ እተ ቀደሙ ዕጩትኒመት ገዛፍ ህሌት” እት ልብል ታመት ሐብሬ ሀበዩ።

ሳልሕ ላተ እሊ ከበር እሊ እግሉ ብሸራት ዐለ። ሐጀ ነፊሰ እንዲ ረክበ ወወደዐ እንዲ ሰርደት እግሉ እሲትክ እት አካን ፍላን

ህሌት እግል ቲበሉ ትረመጩ። ሻፍግ ዲብ እንቱ ወለእናሰ እተ ዎሮት እግሩ ዲብ ቀሴ ሐድገዩ ከክባባይ ገብአ ምኑ።

ሐቆ እለ ላተ ሳልሕ ልሰዕ ልቡ እንዲ ኢሰክብ ዲብ ልሰኣል ወለአተንትን እብለ እናሰ ለሐበረዩተ ገበይ ሄረረ። ለአካን ክምሰል በጽሐ ላተ እብ አደማታት ርግሕት እት እንተ ጸንሐቱ። ለአደማታት ዎሮትክ እብ ቀረዱ ማጽእ ዐለ። ሳልሕመ ምስለ ዲቡ ለጸንሐው ሪገቱ ጸብጠ። ክምሩ ዲብ ለሐናፍል ህዩ እግለ እዱሉዩ ለዐለ አግሩሽ መቸ እንዲ አበለ እብ ሸፋግ እግል ትበሸሩ እት ለሐዘ አሰክለ እሲት አትቃመተ።

ሐጀ ነፊሰ ዲብ ሳልሕ እንዲ ትወለበት፤ “አሀ ወድ ሰብ እንተ ህዩ፤ እብ ሚ እግል ተአተሰርድ መጽኣከ?” ዲብ ትብል አሰልፍ ሸቅለ እንዲ ኢተአሰብዴ ትሰኣለቱ። ሳልሕ ላተ ማሸጋይ ዲብ እንቱ ወክርንቱ ዲብ ትትባተክ ምኑ፤ “ጩዋይት ሰሊም ለትትበህል ሐማዩ እለ ኬደት እንዲ ኢተአተብል አሰክ እለ አሰረ ወከበረ በደ ምኒኑ። አዘ ዲብኪ ወዲብ ረቢ ማጽእ ህሌኮ” ዲብ ልብል እብ ከበር ሰኒ እግል ትበሸሩ እዘኑ አተናከለ ወዕንታቱ አሰክ አቅመተ።

ሐጀ ነፊሰ እግለ ወድዐ ለዐል እንዲ ለክፈት ዲብለ ምድር በደድ አክለ ቤለ ሰኒ ትፈጥኑ ወትትፈላሰፍ እቱ ዐለት። ዲቡ ወድዐት ሐቱ ክልዶል እብ እንቅራረ ትገብእ ወሐቱመ ምነ እማተ ትሸተት ሰበት ዐለት፤ ሳልሕ ህግያህ ሳርዳይት እንዲ ኢሰሚዕ ኖሱ ሳርዳይ እንዲ ገብአ፤ እምበል እኩይ ሰኒ ልትረኣዩ ይዐለ። ለግፍትእት ዐለት ወድዐት ህዩ ጩዋይት እት አካን ሐቱ ማይተት ህሌት ለልብል ፈሀም አብዩአቱ።

ለወዴዕ ካልእ ዶል ክምሰል ለክፈቱመ እብ እንቅዕራራቱ ገብእ ሰበት ዐለ እሊመ ተርጀመት ብዕደት ሀበዩ። ሐቆ መደት ሐጀ ነፊሰ ዲብ ሳልሕ እንዲ ትወለበት፤ “ሰመዕ አወል ለናይክ ዓርባይት በሐር ትትዐዴ ህሌት። ወለ እግለን ዋልድ እንተ አርበዕ ወሌተት እት በክዩ ገበይክ ለአተቅብለ ህለዩ” ቲለቱ።

አይወ ሐጀ ነፊሰ ጩዋይት ኖሳመ በሐር ውሕጠተ ምን ኢተህሌ ላቱ፤ በታተን እትለ እድንዩ ይህሌት። ዮም እለን እብ ሰፈላለ ህሉጋት ለህለዩ አርበዕ አዌልዳተ እንዲ ሐድገት ከካልእ አካን ወአብሐር እግል ትትዐዴ ህዩ እንተ ኢቲበለ ወዐድክ ኢልድገሙ፤ አዳም ህዩ ለእበ ለአሙኑ እለ ልብል።

ሳልሕ ላተ እግለ በህል ናይ

ሐጀ ነፊሰ እዝኑ ሰበት ኢትከበተቱ ወእግል ልእሙኑ ሰበት ኢሐዘ ምስለ እት መክሐደ አተ። “ህቱ እሊ ወድዕኪ ሰኒ ልብ ካርዩት እግሉ ህሌኪ፤ ሚቱ ዶል እብ እንቅዕራሩ ገብእ ወዶል ልትገፋተእ ህለ፤ ዩምክን እለ ለእበይን ሸንክትን ቃርበት ህሌት ወድዐት ብሸራት ኬር ህተ ትገብእ፤ ዩምክን ጩዋይት ዲብ እንተ ምን ከደን ዐድ ተኣቱ ህሌት፤ ሰኒ ፍጤኑ ወባሕሰዩ እንቲዲ” ቤለዩ፤ ኖሱ እት ሴርዳይ ለትቀየረ እት መሰል።

ሐጀ ነፊሰ ላተ መፋረደት ሳልሕ ሰኒ አቤተ ወትካደት። “የሀ ወድ ሰብ እንተ ወዴዕ እግል ትሰረድ መጽኣከ መ እግል ተአተሰርድ፤ አዘ ህዩ ወዴዕ እግል ተአትሐሴ ለዐል ወተሐት ኢቲበል ጀመል እግልኩ፤ እሊ ህዩ ሸቅልዬቱ ዲኢኮን ሸቅልክ ኢኮን” ቲለቱ ሓርቀት ወንክድት ዲብ እንተ።

ሳልሕመ እሊ ሰድ እሊ ዲብ ሐጀ ነፊሰ እንዲ ትወለበ “አነ ለምኑ ማጽእ ህሌኮ በለድ ረዩምቱ። ወክመ እለ እብለኪ ህሌኮ እሲት ባድዩት ምንዬተ። እለ እሲት እለ ህዩ እብ አርወሐተ ሌጠ ባድዩት ይህሌት፤ አርበዕ ዕንቃቅ አዌልዳት እንዲ ሐድገት እግልዬቱ ምክራዩ ለትቀዌት። አዘ እግለ እግል አሰርደኪ መጽኣኮ ዲኢኮን ብዕድ ሻማት አለብዬ። ምን ጩዋይት ለዐቤ ህዩ ሴመ አለብዬ” ቤለዩ፤ ዩምክን አማን አሰኣልክወ ምንገብእ ህታመ አማን ተሰእለኒ እንዲ ቤለ።

አዘመ ሐጀ ነፊሰ ወድዐ እግል ትሰረድ አምበተት። አክለ ሰርደት ህዩ ዲብ ሳልሕ ውልብ እንዲ ትብል ሰኣል ዎሮት ትወጀህ እቱ። ሳልሕመ ገሌ እብ ገበይ በልሰ እቱ ወሰርመ ልትቃረመ እቱ ዐለ። “ሰመዕ ሳልሕ እሲትክ ሐቲተት ምን ሐወ ወሐዋታተ?” እት ትብል ሰኣል ወጀህት እቱ።

ሳልሕመ “ አይወ ሐጀ ረቢ ኢወደዩ እዩ እንዲኢኮን አምዕል ህዳይን አናመ ሰኒ አትሸነህ ዐልኩ። ሐኪ አነ ወበዐል ፈረዕኪ ላተ እብላተ ዐልኮ አክል ሐ ወሕት ሳኪን ኢገብአኮ እግለ። እሊ ክሉ ዲብ ወዴዕኪ ለካሬኒ ህዩ እዴ ኖሼተ። ጩዋይት ሚ ወዴት!” ቤለ ወክምሰል ሕርመት ዕንታቱ ትማለኦ ወንዮቱ ሐጭረት ወክርንቱ ትባተክት ምኑ።

እሊ ሰድ እሊ ሐጀ ነፊሰ ዲብ ትሰሐቅ፤ ገደ ወብሶተ ለረክበት እት መሰል፤ “ሰብ ተብዕን ጤልመት አማካት እንቱም። ወመእሙናዩ ለጠልም ህዩ ዲመ ልትከማጀን” እት ትብል አዘመ ምን ሰሪደ ወዴዕ እንዲ ሐልፈት እት ረኣሰ መትሸውሻሩ ለትሸውሸሩ ዘዐት ደርቤት እቱ።

ትተላሌ....



ዐቦት አንሳይት ሚርሐይት መሳዋት አንሳት እት አቅሊም ምግብ

የም ዓመት እድንያይት ምዕል አንሳት “ዐቦት አንሳይት ሚርሐይት መሳዋት” እት ሐንቴለ ትብል ስቅራት እት ክለ ወጠን ትዘከረት። ዲብ አቅሊም ምግብ እት ቃዕት ኤክስፖ እብ ካልእ ደረጃት መድረሰት አስመረ ሐፊሻዊ ለትዳለ ዕፌ ዓዳት ክምሰልሁመ እብ እዳረት ምዳርየት ገዘባንደ ለትዳለ ሕራብ እቡ ለገምለት ሄሰት እንዴ ገሓት ሽዑብ እብ ሕሽመት ዐባይ ፈቅደዩ።

እት መናሰበት መስኦለት መሕበር ወጠን አዋልድ አንሳት ኤረትርየ አቅሊም ምግብ አሰይደ አለም በላይ ከሊመት መሕበር ተአሰሚዕ እት ሀሌት፡፡ ሓክም አቅሊም ምግብ ሚጀር ጀነራል ረመዳን ዑሰማን አውልያይ አንሳት ለክሱት ሀላ አብካት ተዕሊም ወምህነት እብ ዋጅብ እት መንፈዐተን እግል ለአውዕላሁ፡፡ ህዳይ ንእሽ እማት ወአበው እግል ልንኩ፡፡ ወክሸሶ ሰሜቱ እግል ትትከሬ ክሉ ዋልድ ወሙጅተመዕ እብ ጅድየት እግል ልትጸገም ለተአትፋቅድ ከሊመት ቀደመ።

መሕበር ወጠን ሸባብ ወደረሰ ኤረትርየ ናይለ አቅሊም፡፡ አንሳት እት ተአሰትሀለን አካን እግል ልብጸሐ ሐድ ቅድረቱ ክም ልትጸገም እት መናሰበት ዲብለ ቀደመየ ናይ ምስንዮት ከሊመቱ አከደ።

ምን እብ መድረሰት አስመረ ሓፊሻዊ ለትቀደመ ጽበዋ ሐቲ፡፡ አንሳት ኤረትርየ ጀለ ተሕሪር ለደፍዐያሁ ተበን ቃሊ ለትሸፈሕ ተምሲልየት እግል ንዝክር እንቀድር። ምን መጸጸት ጅረሕ ለመርር ወምን ሞት ለከብድ እስትሸሃድ። ጽበዋለ ተምሲልየት ክእነ ተሌቲ።

ሐቲ ሙናድለት ምን ሚዳን አሰክ መዳኒት ትለአክ። ምህመተ (መዘ) ሀዩ፡፡ እግል አር ጅብህት ሸዕብየት ተሐዝዮ ለዐለት ህብዋ አባይ ዐቢ እት ሸረክ ሻመ እንዴ አቲቱ አክልሕድ ክም አምዮ ወፈተዮ፡፡ ምን ለልትሐዜ መዕሉማት አሰክ ሚዳን እግል ትልአክ። እት ልበ ለይዕሉ፡፡ እግል ቅታሉ ለፈግረት አባይ እት ቀበት ዐደ ክም በዐል ሻሙ እት ሐንቴሁ እግል ተአሸለማልም ወትሻምሉ ምን ዐንደል መረት ዲበ። ምናተ ጀለ ተሕሪር ወጠን ደለ ምን ትጠለብ እግል ቲዴ ምሰል ነፍሰ ቀሰም አይተት ምን ዐለት፡፡ ለሰም እግል ትቀርዳዕ እብ ክሉ



ሐጠር ትዳሌት።

ለመናድለት አምሐራይ ሰበት ተህዴት አዳመ ክሉ ሬመዩ። አቡህ እብ ገሀይ ከብዱ ምን በሸለት ምን ገበዩ እግል ተአቅብል ጀዋብ ከትብ ዲበ። ከቤለየ ”እምኪ እለ እንዴ ኢትርኤ ዳር አማነ ምን አቲት ሰዲደት ተ። አናመ እት እለ ዋይደጅ ሀሌኪ አትሀደጊት እግል እርገመኪ ኢኮን። ምናተ እብኪ ምን ከጀልኮ ወደነንኮ ዲብ አዳም እግል እትሓበር ኢቀደርኩ። ረቢ እት ኬር እንዴ ሀዴኪ ለገበይ እለ ጸብጠት ሀሌኪ ምን ተሐዲገ ሰኒ ሰኔት። ለትሰረረተ፡፡ እት ረቢዬ እደዴ ድኢኮን እለ እብለኪ አለብዬ!”

አዳመ ለወቀየ ምን የአመረው እለ፡ ልበ ዲብ ነድድ ምን እሉ ተሀየበት ሸቅል እንዴ ኢትበዋር ምህመተ ተመት። ህተ ሚዳን እግል



ተአቅብል ክምቱ ወለነፈር አምሩ ዲብ እዴ ጅብህት እግል ትሕደገ ተሐበረት። እለ ኢኮት እለ እብ ፈርሐት እግል ትሳረር ዲብ ዐለት እለ፡ ካልእ ገሀይ ወሰከት። ምን ናይ መብደእ አባዩ ሕኖት ጸብጠት ዐለት። ለሐብሬ ሀበወ መልሂተ ለሓለተ ክም ደለው “ኢትሻቀሊ እቡ ለጅኑ ምን ኤረትርያይት ለትወለደ ኤረትርያይ ክም ገብእ ሸክ ሚበ” ክም ቤለው፡ ህታመ እግለ ዘዐት ሰኒ ዶል አዳወረተ

ትበዜሕ። አሰይደ አለም በላይ እት ቀደመተ ከሊመት መሕበር ዝኩር ክምላ ሀሌ፡ ፈድል ጅህድ ሸዑብ ወሕኩመት አንሳት እት ዐማር ወክድመት ወጠን፡ ምህነት ወተዕሊም መሻረከተን ለተሐብን ምንመ ትገብእ ለትሕዜ ደረጃት ባጽሐት ኢሀሌት። እት ምህነት ዐባይ ወበቃዕት ለለሐዜ አሸቃል ዕልበን ሰኒ ሐድ ሀሌ። እት ቀራር ለልትሀየብ እቱ ደረጃት ሰልጠት ለሀሌት እለን ተውኪለትመ ሰኒ ሕድት ተ።

አንሳት የዐበዩ ወኢትቀደመየ ምንገብእ፡ ሙጅተመዕ እግል ልትቀደም ወዐቡ እት አሳሰ ሓጥዋ እግል ልትነደቅ ሰበት ኢቀድር፡፡ ዐቡተን ተክል ለሀለ ሚ ክምቱ እንዴ ትፈረገ መፍቴሕ ዲብ ልትረከብ እሉ እግል ሊጊስ ቡ። ናይ የም ዓመት ስቅራት ሰማን ማርስ ራፍዐተ ለሀሌት ልእከት በገ እለ ለትበይንተ።

እለ ዲበ ሀሌን መርሐለት አንሳት ብዝሓት ምህነት ወተዕሊም ረክበ ሀለዩ። እበ ምህነተን ዶረን

እት መጅተመዕ ዲብ ለአገድየ መስኦለት ዕበያት ውላድ ግረ እግል ተአትርፈን አለበ። ምን ሸቅለን ወምህነተን እንዴ ኢልትነወክ እት ገበይ ዐቦት እግል ልሄርረ ወውላድ ዑፋይ ወሳልሕ እግል ልረብዩ ሀላ እለን። ለዲበ ሀሌን ሓለት ሀዩ እት አካን ሸቅለን ክል መአሰሰት ሸቅል እበ ትወጤት እለ አካን መራዐየት አጀኒት(ሕዳነት) እግል ተሀሌ ለትጅብርተ። እለ ሰበር እለ እንዴ ፈረገያህ መባደረት ለነሰአየ ናይ ሕኩመት ወብሕተ መአሰሰት ሀዩ መ.ወ.አ.አ.ኤ. እት ከሊመቱ ሐመደዩን። እት ምዕልለ ዝክረት(ሰማን ማርስ 2018) እስብዳልየት ሐዝሐዝ ወእስብዳልየት ሐሊበት ክልኢተን እግል መራዐየት አጀኒት ለአዳለያሁ አካናት አድሐረዩ።

ልትዐቀበ ምን ወልትዳወየ ለኸሰሰ መሓደራት ተሀየበ።

እለ ዕላመት ምስንዮት አንሳት እት ቀድየት መሳዋት ወሰን ወድ አዳም ላተ እድንያይት ምዕል ሰማን ማርስ ኤረትርየን እት ዐድ ወካርጅ እብ ሕሽመት ዐባይ ክም ዐየደያህ ምን ክል አካን ለመጽኤን ሐብሬ አከደ።

አቅሊም ዐንሰበ እብ ደረጃት አቅሊም የም 05 ማርስ ዲብ ገለብ ዐየደዩ። ሓክምለ አቅሊም አሰይድ ዐሊ መሕመድ፡፡ አንሳት ለፍቶሕ እለን ሀላ አብካት እብ ተአሰትሀል እግል ልትነፈዐ እቡ ትፋኑ። ዲብ ከረንመ 950 ሸቃለ ሕኩመት፡፡ ክድመት ቴክኒክ ወደረሰ ለልትረከበ እተን አንሳት፡፡ እስብዳልየት ከረን አንደፈየ ወዕጪይ አቅብር ምሕርበት ከሰከሰዩ።

አቅሊም ግብለት ሀዩ ለመሕበር እበ ነሰአየ መባደረት ዲብ መንደፈረ ተበሩዕ ደም ገብእ። መሕበር፡፡ ኤረትርያት አንሳት እብ ተዕሊም ወምህነት እብ ፈን ወርያደት እንዴ ዐበዩ መትጃግረት እግል ልግበእ እብለ ትቀደረቱ ክም ለአትናይት ወሰዴ ለልትአመርቱ። ፈሬዕ አቅሊም ምግብ ሀዩ እግል እት እምትሓን ሳምናይ ፈሰል በሀለት ጀነራል ምን 90- 99.2 ምን ምእት ለአምጸአየ 570 ደረሳይት ጀዋእዝ ሀበ። ገዳይም ርያድያት እግል ለአትናይታመ ኖሰኖሰን እት ወደያሁ እግል ገማል ሰማን ማርስ ለገብእ ጅግረ እግል ተዐወተ ፍሪቅ ካሰ ሀበ።

መሕበር እት አቅሊም ቅ/በ/ ቀየሕ ሀዩ እብ ምህነት ወተዕሊም እግል ፈደበዩ 46 አንሳይት ጀዋእዝ ሀበ። እድንያይት ምዕል አንሳት እግል ቀድየት መሳዋት ዝያድ እግል ተአደቅበ ወክል ዎር ገለዱ እግል ለአትሐድሰ ዲበ ለገብአተ እንድኢኮን፡፡ ክል ምዕል ወሳዕት እብ ሐቅ ክል መዋጥን፡ መሳዋት ወዐቦት ገበልን ለተሐደሰ እግል ልሕሰብ ዋጅብ ቲ።





ንዳል አንሳት

እብ መናሰበት 25 ሰነት ዲድ እስትቅላል ኤረትሮፕ ክምሰል ኦተላላይ ናይላ ተጽርብ ንዳል ለሉካኬ እብ ዶልዶሉ ልትከተብ ለዐለ ቅሰስ ታሪክ ንዳል አዋልድ አንሳት ኤረትሮፕ ሐጠረን፡ ፍርስነትን፡ መትሰባለን ውበዕድ ወጠንያይ ወራታተን ለሉካኬ ክታብ ጠበዐ። ከክምሰል መእተዮ ናይላ ክታብ ለትከተብ ጽበዋ ልተላሌ ከእግል ዮም 2ይ ክፈል፡-

መእተዮ

“ለትፈናተ ባሊ ወሐዲስ እጅትማዕያይ አንዝመት፡ ዐሚም ወገዲብ ናይ ፍንቲያም ጠበቃት ሙጅተመዕ እግል ለአንግሶ፡ እግል ውላድ ተብዕን ወአዋልድ አንሳት ጀፈር እንዴ አጽበጠው ግብእ ዋይዳም እቶም ቶም። ወእትእንቲ ለግቢእ እበ አከ ወጅሁ፡ እግል አካን ወተረት አዋልድ አንሳት ገደብት። ንዳል ጀለ ሕርየት ሆይ፡ ወጠንያይ ልግቢእ ወእጅትማዕያይ ዲመ ዝልም ለልአሰርት ዲናሚካይት ሐረከት ቲ...” = (አክቶበር 2009)

“ሐቲ ምን ፍንቲት ንዳል ሰለሕ ሽዑብ ኤረትሮፕ፡ አዋልድ አንሳት እብ ብዝሐ ለአሻረከ ምን ዐላቲ። እለ መሻረከት እለ ረዩም ወሕቡሉክ ሄራር እንዴ ተዐዲት ለመጽአት ወእብ ትሩድ ሸቅል ሲያሰት ጀብሆት ሸዕብየት ለትከለቀት ተ።... እት ንዳል ሽዑብ ኤረትሮፕ ለዐለት መሻረከት አንሳት እግል መናዝር እንዴ ኢጉብእ፡ እብ ጽበዋ እግል ንዳል ታምም ለወዴት መሻረከት ተ።” =

አክቶበር 2014)
ርኢስ ኢሲያስ አፈወርቂ፡ እት 25 ወ30 ሰነት ምን ተእሲስ መ/ወ/አ/አ/ኤ

ሐጨር ታሪክ ንዳል ኤረትሮፕት አንሳት

ንዳል ተሕሪር ሽዑብ ኤረትሮፕ ድድ እስትዕማር ሌጠ እንዴ ኢጉብእ፡ ድድ ኩሉ ድንጉር ዓዳት ወእምነት ሙጅተመዕ ለትወጀህ ዐለ። ንዳል ሽዑብ ኤረትሮፕ እንዴ መርሐ ዲብ ዐውቲ ለአብጸሐዩ ሚርሓይ ተንዝም ጀብሆት ሸዕብየ፡ አከዶት ሕቁቅ ወመሳዋት ናይላ ሰር ሙጅተመዕ ላተን አዋልድ አንሳት አሳስ ነዲቅ ዐዳለት እጅትማዕያት ለትመደደት እቲ ሙጅተመዕ ክምቲ እንዴ አምነ፡ ዲብ ታሪክ ሰዋር ዐለም እብ መሰል ሰኔት እግል ትትሀደግ ለትቀድር ዋሰዐት መሻረካት አንሳት ዲብ ንዳል ጀለ ተሕሪር እግል ለአክድ ለቀድረ ተንዝምቲ። አማንቲ፡ ዲብ



ለትፈናተ ሰዋር ዐለም፡ ትውሐድ ወትብዘሕ መሻረከት አንሳት ዐለት፡ ክምለ ዲብ ጀብሆት ሸዕብየት ለትረኤት ለተአደሚዕ ወእብ ዐመል ለተሌት መሻረከት አንሳት ዲብ ኩሉ መጃላት ናይላ ንዳል ላኪን ሰኔ ሕድትት።

አንሳት ኤረትሮፕ ክም ክትፈት ገቢል ኤረትሮፕ፡ ኩሉ ጅንሰ መላጣዋ ወመጭቀዋ እስትዕማር ጸውረ እት ሀለዩ፡ እት ረከሰመ እት እጅትማዕያይ ወናይ ዓዳት ተሸኪል ሙጅተመዕ አቅሩድ ለዋተደ አዋልድ አንሳት ምንገብእዩ ሌጠ እብ ፍንቲይ ለጀሬ እተን፡ ክቡድ



ዝ ዓይ ጅንሰመ ሰበት ዐለ፡ ለጀሬ እተን ዝሉማት እብ ዕጹፍ ዐለ። ሙጅተመዕ ኤረትሮፕ፡ ክምለበዝሐ ሙጅተመዕ ዐለም፡ እብ ንዝም አበዊ፡ ዓዳት ወለመድ ለልትመረሕ ምን ዐለ፡ አዋልድ አንሳት ምን ኩሉ ናይ ሲያሰት፡ እዳረት ወእቅትሳድ ወራታት ለሸንክዩ ዐለ። እብ መጀቡ ሆይ ሕቁቀን ሕግጩር ዐለ። እግል ዶር አንሳይት እት ካልእ ደረጀት ለረትብ፡ ዓዳት ድንጉር፡ ዓዳት ወንዝም እጅትማዒ ዲብላ ህለ እቲ ሙጅተመዕ ሆይ፡ አከዶት ታ’መት ሕርየት አንሳት እብ ቀላል እግል ልትበጸሕ ለቀድር ሀደፍ የዐለ። እትሊ ንዳል እሊ እት አውለውየት ለልትረተብ ተሐዲ፡ ለእግል ዐሚም ተብዐት ወምክሔ አሳስ ላቲ፡ ዲብ ተፍኪር ሙጅተመዕ አዝቡን ሳብቅ ለጸንሐ ዓዳት ወለመድቲ። ለእት

ካልእ ደረጀት ለልትረተብ ተሐዲ ሆይ፡ እት አንሳት ኖሰን ለሰብቀ መንፈስ(ሽዑር) ሆኖት ነፍስ ወዐደም ደማነት እት ኖስቲ። ሰበት እሊ አዋልድ አንሳት እግል እሊ ሽዑር ሆኖት ነፍስ እንዴ ፈ’ለየ እብ ዐመል መቅደረተን ለለርእየ እበ አርደት እግል ትዋፈሕ እለን ዐለት እለ። እግልሚ፡ ዐሚም ወናይ ምክሔ አፍካር ውላድ ተብዕን እት አንሳት፡ እምበል መሻረከት ፈዓልየት እብ ገቢይ ብዕደት እግል ልትፈለል ለቀድር የዐለ።

እለ ምንገብእት፡ ጀብሆት ሸዕብየት፡ እግል ክልኦት እሎም ተሐድያት ዐባዩ እንዴ ተዐዲት፡ ሐቅ ወመሳዋት አዋልድ አንሳት እግል ተአክድ ትሩድ ወቀይ ሲያሰት ጠልበ ምነ። ከሰውረት ኤረትሮፕ፡ እት ሐቲ ኢነት ንዳል ወጠኒ ድድ

እስትዕማር ወጀለ እስትቅላል፡ ንዳል እጅትማዒ ድድ ናይላ አቅሩድ ትሩድ ለዐለ እሉ ዓዳት ጸንዲት ወአበዊ ወአፍካር እግል እሸትራክያይ ሄራርቲ ለዐለ።

ከልፍየት ታሪክየት

ንዳል አንሳት ለኢልትፈንቲ ጅዙእ ናይላ ሕርየት፡ ዐዳለት፡ መሳዋት፡ ተጠውር ወሰላም ለጠልብ እድንያይ ንዳል ወድ አዳምቲ። እብሊ ሰብብ ንዳል አንሳት ዐለምነ፡ ጅዙእ ናይላ ቅብላት ናይ ጠበቀት፡ እስትዕማር፡ ዓዳት፡ እጅትማዕያት ወናይ ጅንሰ መጭቀዋ ለገብእ ንዳላት ወሰዋር እት እንቲ እንረክቡ። መላጣዋ ወመጭቀዋ ሙጅተመዕ እብ ግዕባቡ፡ አሳሱ ዲብላ እግል መሰሊሐት ሐዳም መስተዕምረት ጠበቃት ለከድም ንዝም ሲያሰት ወእቅትሳድቲ። እሊ አሳስ እሊ ምን ቅርዱ እንዴ ኢልትመሐ ሆይ፡ ኩሉህ ታመት ሕርየት እግል ትትአከድ ኢትቀድር። ሙጅተመዕ እብ ተማሙ እቅትሳድያይ፡ ሲያሲያይ ወናይ ዓዳት ሕርየት እንዴ ኢመልከ አዋልድ አንሳት በይነን ሕርየት ወመሳዋት እግል ትትአከድ እለን ለልትቀደር ኢነን። እትሊ ሐቁቀት እለ እንዴ ተንኩብኩ መብዝሐ ዲብ ታሪክ ዐለምነ ለትረከ ሐረካት አዋልድ አንሳት፡ መጦር ውላድ ተብዕን እንዴ ተዐንደቅክ ንዳል ሰውሪ



እት ገብእ፡ ለትሳወ ሙጅተመዕ እግል ልትነደቅ ወአሰክ ታ’መት ሕርየትት እግል ለአለምቤ ናደለ።

መሳዋት አዋልድ አንሳት ረዩም ሄራር ናይ እቅትሳድ፡ እጅትማዕያት ወዓዳት መትዐዳዳይ ለመጽአቲ ድኢኮን፡ እብ ረሕመት፡ ቅረዲት አው አዋጅ ለልትአከድ ክም ኢነን ዲብ ታሪክ ለተአከዳቲ። እግል መሰል፡ እት ብዝሓት ለትጠወረየ ድወል፡ መሳዋት እት ቃኑን ሰጁል እት እንቲ፡ እብ ሰብብል እት ተርቲብ ጠበቃት ለተአሰስ እቅትሳድያይ ወሲያሲያይ ዐሚም፡ መሳዋት እብ ዐመል እግል ልትአከድ ኢቀድረ። እብሊ ሆይ፡ ሐቅ ወመሳዋት አንሳይት እብ ቃኑን አከዶቲ ወእት ዐገል ሲያሰት ወጠን አካን አጽበጦቲ ምህም ምንማቲ፡ በይነ ላቲ ካሬ ኢነን። ሰበት እሊ እምበል አሳስ ሲያሰት፡ እቅትሳድ ወዓዳት፡ መሳዋት እብ ቃኑን እብ በይነ ታምም ኢነን። ኩሉ መጋድእ ቃኑን እንዴ ሸንክኩ፡ ለኢትሳወ ንዝም እቅትሳድ እንዴ አሰረትኩ ድንጉር ወባሊ አፍካር እብ ሐዲስ ወመትቀድማይ አፍካር እንዴ በደልኩ መሳዋት አንስ ወተብዐት ዲብ ኩሉ መጃላት ለለትኣቲ አግቡይ እንዴ ኢ’ተሌኩ፡ መሳዋት ለቡ ሙጅተመዕ እግል ትብኔ ለልትቀደር ኢነን። እለ ምንገብእት፡ አዋልድ አንሳት ምነ ዲበን ሌጠ ለክሩይ ፍንቲይ ዝልም ወመጭቀዋ እንዴ አባረየ፡ ዲብ ኩሉ እጅትማዕያይ ወራታት እብ ሕርየት እግል ልሻርኩ፡ እሊ በክት እሊ ለትፈቲሕ አርድየት ተአትሐዝየን። ወለት አንስ ምን ከርስ ቤት እንዴ ፈግረት፡ መሻረከተ ዲብ ወራታት እቅትሳድ፡ ሲያሰት፡ እጅትማዕያት ወዓዳት እግል ትወቀል ካለት ውጢት ትከለቀትም ምንገብእ፡

አንሳት እግል በክት እት ሐቲ ጸብሐት እግል ልትነፈዐ ምነ ወእግል ለአድመዐ ዲቡ ኢቀድረ። ሰበት እሊ፡ መጥ-መጥሩ በቃዐት አንሳት ለረፈዕ ፈዛዐት፡ አምር ወመቅደረት አዳበርት ለአትሐዜ።

ምን እለ ነዝርየት እለ እንዴ ትብገሰ ለበዜሕ ሐረካት አንሳት ዐለምነ ለኢልትፈንቲ ጅዙእ ሐረካት ገቢል ዐለ። ለጀላብ ሐቅ ወመሳዋት ለገብእ ንዳል አንሳት ሆይ፡ ምን ኩሉ ጅንሰ መላጣዋ ወመጭቀዋ ሐር እግል ልፍገር ምስል ንዳል ኩሉ ሙጅተመዕ ለትመቅረሐ ዐለ። ዲብ እሊ ሄራር እሊ ሰውረት ሩሰዩ ምህም መርሐለት ተቅዩር ዐለት። ዲብ አክቶበር ናይ ሰነት 1917 ለተዐወተት ሰውረት ሩሰዩ፡ እግል ናይ ጠበቀት ቀምየት፡ ወጨቅዋ ጅንሰ ወለተርፈ መጭቀዋ ወዝ ለትመለኦ ንዝም ጸንዲት ወረከሰማልዩን እንዴ ደርገት ሰልጠት ክም ጸብጠት፡ እግል ናይ አዝቡን አሳስ ለጸንሐ እሉ፡ እቅትሳድያይ፡ ቃኑንያይ፡ ዲንያይ፡ ለመድ፡ ወለተርፈ አቅሩድ መጭቀዋ እንዴ ናቀለት እብ ሐዲስ ቀዋኒን ወዕላቃት እንዴ ተከአቶ አሳስ መሳዋት ሓጠጠት። እብ ፍንቲይ አዋልድ አንሳት ዲብ እቅትሳድ፡ ሲያሰት፡ ዓዳት፡ ተዕሊም፡ ውበዕድ፡ እብ መሳዋት እግል ኢልሻርክ ለከፊዕ አፍካር እንዴ ሸንክት ባብ ለትሳወ አብነት ፈትሐት። እብሊ ሆይ፡ ሰውረት አክቶበር ናይ ሩሰዩ፡ መስከለት ሐቅ ወመሳዋት አንሳት ምስል ንዳል ገቢል እንዴ አትጸበጠት፡ እግል እድንያይት ሐረከት አንሳት ምዕራፍ ሐዲስ ፈትሐት እሉ ወዐባይ ሲናዶ ገብኣት እሉ።





ምን ኤሪትሮፖላይ ዐድነ ለልንኢሽ ዐዶታት ዐለም

ገሌ መዐሉማት እብ ክሱስ ዐድነ እግል ንቀድም። እለን መዐሉማት እለን እብ ፍንቱይ ደረሰ እዝን እግል ልክረው እግለን ወጀብ።

እብ አሳስለ ምን ክታብ ሶሻል ስታዲስ ናይ ደረሰ ለረክብናሁ ሓብሬ፡ እርትርፖ ዲብ እንክር ምውዳቅ-ጸሓይ በሐር-ቀየሕ እት ቀር-አፍሪቃ ለትትረከብ ዐድ ተ። እርትርፖ እት ፍንጌ 12 ወ18 ድግሪታት ቅብለት ላቲትዩድስ፡ ዲብ 36 ወ 43 ድግሪታት ምፍፍጋር-ጸሓይ ሎንጊትዩድስ ትትረከብ። ሪም በሐር እርትርፖ ሓድ 1216 ኪሎ ምትር ገብእ። ክምሰለ አዳም ለቀይመ እርትርፖ

ደውለት ንኢሽ እንዴ ኢትገብእ፡ ምን 193 ድወል ዐለም 96ይት ትትረተብ። ርሕብ እርትርፖ ሓድ 124,330 ኪሎ ምትር መረበዕ ገብእ። እሊ ህዩ ቅያስ ንኡሽ ኢኮን። እግል መሰል እለን ለተልዩ እብ ርሕብ ምድረን ምን እርትርፖ ለልንኢሽ ሴዕ እሙራት ድወል ንርኤ፡-

□ ቅብለት ኮርዩ	118,480 ኪሎ ምትር መረበዕ
□ ቡልጋርዩ	110,000 ኪሎምትር መረበዕ
□ ኩብ	100,000 ኪሎምትር መረበዕ
□ ሃንጋሪ	93,030 ኪሎምትር መረበዕ
□ ፖርቱጋል	92,239 ኪሎምትር መረበዕ
□ ዲንማርክ	43,094 ኪሎምትር መረበዕ
□ ሆላንድ	41,526 ኪሎምትር መረበዕ
□ ስዊዘርላንድ	41,290 ክሊሎምትር መረበዕ
□ ቤልጁም	32,545 ኪሎምትር መረበዕ

ስበት እሊ እርትርፖ ዐድነ ንኢሽ እንዴ ኢትገብእ እግል ብዝሓት ስሙያት ድወል ለተሐልፍ ደውለት ዐባይ ተ።



መዐሉማት

- ንሳል አዳም እግል ጠምጠሞት ለልትነፊዕ እቡ ስመዕ ተ። ስበት እሊ ንሳል እንክሩ ለሓር መሪር ጠምጠም ፈርግ እት ህለ፡ ጩወት ወእብ ዓመት መሌሕ እት ምግብ፡ ዋዑም ህዩ እብ እንክር ቀደም አው ምልምለቱ ፈርጉ።
- ዲብ ዐለም ለበዝሐ ሕሩፍ ለበ ህግዩ ናይ ካምቦድያ እት ትገብእ፡ 74 ሕሩፋት ህለ እግለ።
- ድሙ ሓጃት ዋዑም እግል ትፈርግ አው ተአዳውር ክምሰል ኢትቀድር ነአምር ገብእ?
- ዲብ ክል ሳዐት ሓድ ምርት ቢልዮን ሴላት ገሮብ እብ ብዕዳም ሴላት ልትበደሎ።
- 70% ምን እት ዐለም ለፈሬ ባምቡላታት ዲብ ሲን (ቸይን) ልትሸቂ።
- ፈረስ ምን ክሎም መጥብዩት ለልዐቤ ዕንታት ህለ እግለ።
- ሰኒ ለትትሐለብ (ወኡት ቅዝር) እት ሓያተ ታመት 200,000 ክባዩት ሓሊብ ተዐምር።

አጥዐሚቶ

አብ--- ስምዐኒ ሰሚር ወልዬ፡ አዜ ሰኣል እግል እትሰአለካቱ እሉ በለስክ ምን ገብእ፡ ለእለ ሐዘክ ሓጃት እግል እትዛቤ እግልካ ተ።

ሰሚር - ሰኒ ይበ!

አብ --- በገ ኦተንሴ፡ እንክ እለ ቤጩት፡ እንዴ ኢትሰበር እት ትፊትተ ሰስ ምትር ሓልፈ ምን ትትበህል ከአፎ ወወዳክ?

ሰሚር--- አይዋ፡ እንዴ ኢትሰበር ምን ገጽ ለዐል አስክ ገጽ ተሐት ሰስ ምትር ሓልፈ ትብለኒ ህለክ?

አብ-- አቤ!

ሰሚር - ገጽ ተሐት ሰቦ ምትር ወፊተትክወ፡ ሰበቡ ህዩ ለሰስ እንዴ ኢትትሰበር እግል ትሕለፎም ሰበት ተ!

አብ - እላ ተ!

ሰሚር- ጃኢዘቼ ዲብ እዳይ!

መራዐዩት አንድብ አግሩዝ ወአጃኒት

አትሐዘዮት ሓሊብ

ሶዩ ወእሎም ለመሰሎ ቶም። ዋልዴን እበ ትትቀደርም እግል አጃኒቶም እብ ካልሰዩም ርዙቅ ላቱ ነበሪት እግል ልመወኖም ለአስትህል። እት አምዕል ክልኤ ክባዩት ሓሊብ ወብዕድ ኖዕ ነበሪት እግል ልብልዖ ህለ እግሎም።

ሓሊብ አግደ ዔማት ካልሰዩም ቱ

ዓጭሞታት ወአንድብ አጃኒት አጊድ ልትጠወር። ሓሊብ ወፍገሪት ሓሊብ አግደ ዔማት ካልሰዩም ሰበት ቶም፡ እግል ዐቦት አጃኒት ምህም ቶም።

አንድብ ንእሽ-ልግበእ ወአንድብ-ዕብ እንዴ ኢበቅሎ ዲብ እንቡተት እት ህለው ካልሰዩም ለአትሐዘዮም። አግሩዝ ክምሰል ትወለደውመ ዑፋያም ትሩዳም ዲብ እንቶም ጀላብ እግል ልዕበው ካልሰዩም ምህም ቱ። ካልሰዩም አንድብ፡ ዓጭሞታት ወዕስር ዑፋያም እንዴ ገብአው እግል ልትጠወር ለነፊዕ መዓድን ቱ።

አግደ ዔማት ካልሰዩም

አግደ ዔማት ካልሰዩም ላቶም ነበሪት ጅብነት፡ ሓሊብ ወጩር(ርግኦ)፡ ብሮክሊ፡ ዘርእ ቀርፈ፡ ሐመሊት አክደር፡ ሓሊብ

አንድብ አጃኒት ትሩዳም ወዑፋያም እንዴ ገብአው ጀላብ እግል ልዕበው እግል ንተብዑ ለወጃብን መምርሒታት፡-

- አጊድ ዲብ አንድብ እግል ልልዋኦ ለቀድሮ ክምሰል ከረ ፈርዶት ናሸፍ፡ ዘቢብ ናሸፍ፡ ሐለዋት ወእሎም ለመሰሎ እግል ንቅረቦም አለብክ። ሰበቡ ህዩ ሐቱ ዶል ዲብ አንድብ ሐቆ ለጥአው፡ እግል ትሕጸቦም ቀሊል ኢኮን። ሰበት እሊ ጃኒ እሊ ነበሪት እሊ ሐቆ ነስኦ፡ አጊድ አፋሁ እንዴ መጭመጨ እግል ልወርክዮም ወጅብ።

ፈርማጆ

- እግል ጠዓሞ ስከርያት ለቦም ነበሪት ክምሰል ሐለዋት አው ችኮላተ እግል ነሀቦም ኢወጅብ።

እሊ ነበሪት እግል ነሀቦም ሐቆ አትሐዘ ህዩ፡ ዲብ ውካን ነብረ እግል ልግበእ ለሐሳቱ።

- ትቀደረ ምን ገብእ ምን ውካን ነብረ በረ ጠዓሞ እግል ነሀብ ኢወጅብ አው ህዩ ሐዳይ እግል ነሀብ ብክ። አጃኒት ስከር ለቡ ነበሪት ሐቆ በልወው እግል አንድብ ለልአደሚዕ አሲድ ዲብ ወቅት ጠዓሞት ልትሸቂ።

ጠዓሞ ክምሰል በልዕን አንድብ ነአንድፍ

- ክምሰል ከረ በናን ወማንጉስ ለመሰሎ ፈርዶት እብ ብዝሐ ስከር ምንመ ብዲዖም፡ እበ

ትትቀደረኒ አጃኒት ብዘሕ ፈርዶት ወሐመሊት እግል ንመውኖም ለአስትህል። ምናተ፡ ጃኒ እሎም ፈርዶት ወሐመሊት ክምሰል በልዕ አጊድ አፍሁ እግል ልመጭምጭ ወጅብ። እሊ ህዩ ኖስን እግል ንራቅቡ ለአስትህል።

- ሕነ አጃኒት ስከርያት ለቡ ዐሳይር ወጭመም ሕኔት እንጠልብ ኢፋልን! ኢነሐዜ እግል ኒበል ወጅብ። እግል አጃኒት ክምሰል ከረ ሓሊብ፡ ማይ ውብዘሕ ስከር ለአለቦም ሐዳይስ ፈርዶት እግል ነሀቦም ለአትሐዘ። ሙነት ሰኔት ምሰል ነዳፈት አፍ እግል ትትመሳኔ ህሌት እግለ። እሊ በህለት፡ ክል-ምዕል ፍርሸት



መትነፍያት፡ አንድብ ለለአነድፍ ኬዋ እቡ አንደፎት፡ ንዘም ላቱ መርመረ አፍ ውድዩት፡ ክሉ እሊ ምሰል እንዴ ትጀምዐ ምን እግል ልምጸእ ለቀድር አሸዐሾት አንድብ ዳፊዕ እግል። ሰበት እሊ፡ አጃኒት ክል-ዶል እት ወቅት ጠዓሞ ልግበእ ውካን ነብረ አንድቦም እብ ዋጅብ ክምሰል ለለአነድፍ እግል ነአክድ ህለ እግል።

- ሰርም ገሌ አስርየት እግል ልጠዐም እንዴ ትበህለው ስከር ልትሓበር ዲዖም። ምሰል ሐኪም እንዴ ትጋሚክ አጃኒት ምን ስከር ናግያም ላቶም አስርየት እግል ልንስኦ ለአትሐዘ።

“ዔማት፡ ክታብ “ክንክን አሰናን ህጻናትን ቀልዑን”



ዕሉም አሳር ወመፍሁም ዕላቀት ምጅተመዕ ምስል ድዋሩ

አብርሃም ዘርአይ



ካይሳም ወካይሳት ቂርኢት ጀሪደት ኤረትርየ ሐዳስ እተ ለሐልፈት ሳምን 1ይ ክፋል እሊ መውዱዕ እሊ ቅዱማም እግልኩም ኦኦልነ የም ህይ 2ይ ወናይ ደንጎበ ክፈሉ እግል ንቀድም እግልኩም ቱ ከቅራኣት በኪተት እት እንብል እተ ታምም ጽበጡ ንዐዴኩም።

ተሐድያት እዳረት ዝሕረት ማይ እብ መቃብል መትናፍያት ገበይ ዓቅለት እግል ንርአዩ ክም ብከ ለልሐብር ሐደስ እንዴ ገብእ እግል ንርአዩ፡ እብሊ ህይ ምስለ ሐልፈ ተጃርብ ምጅተመዓት ኤረትርየ እንዴ ትጸበጠ እሎም እት ጀዛይር ደሀለክ ለትበኻ ቅዱም መካዘን ማይ (ባሰካት)፡ መርጀዕ እግል ልግበእ



እግልነ እብሊ ህይ እብ ክሰሉ እግል ንታይን ወንድረስ ምኑ ለኣትሐዜ። ጠቢዐታይ ንቃዋ ወ ድቁጣት ድዋር እግል ምጅተመዓት ወተሐድያቱ ለልኦመጽእዉ ኦኦልነ እንዴ ገብአው፡ ቅዱም ምጅተመዓት እት ድዋርም ለወድዉ ተቅዩራት እበ ብዕድ እንክር፡ ዒን መትረይሐት ወፍዋር እሊ ሐዲስ ግም እሊ ቱ። እሊ እቱ ለህሌነ ቴለል፡ ዘበነይት ዐለም ቴክኖሎጂ ዝሕርታቱ ለልትርኤ እቱ ክፈል ታሪክ ወድ ኦዳም ቱ።

እሊ ቴክኖሎጂ እሊ ዝያደት እሊ ምስለ ሐልፈ ናይ ለመድ ኦሰሉብ ምጅተመዓት ዶል ልትሳነን፡ ኣተላለዮት ምጅተመዓት እግል ኣከዶት ለገብእ ዶር ምነ እትሊ ዘበን ለህለ ተሐድያት ጋብእ ህለ።

ለህለ ኣግማም መትዐጃቦም፡ ወፍዋርም እግል ርብሕ ምጅተመዓት ለነፍዕ እግል ሊደዉ ሐለት ለወሰክ ቱ። ዘበናይ ሸክል መዲነት ኣስመረ እግል ለትፈናተ ቅርድ ኦድያናት ኣሳስ ለከሬ ወእግል ኣግማም እብ ኔብረት ለልትፈጠር ናይ ለመድ ሐቂቀት ምስል ናይ ከደን መባትክ ምድር እንዴ ኣትጸበጠ፡ እግል እብ ዋጅብ ጆሜትራይ ቅያሶም ጸብጣም ለህለው ሸዋርዕ እንዴ ሐቅፈ ለትዳለ፡ ክምስልሁመ እግል ክድመት ወጅንስ እስትዕማር ሀደፍ ለወደ መትካፋል በህለት zones፡ ለትነፈዐ እቡ ፍንቱይ

እስባት ናይለ እት መኣንበት 20 ክፈል ዘበን ለትርኤ ዐቦት ወሐዳስ ምህነት ስታት መዲነት ቱ።

ሸክል ብከእ መዲነት ኣስመረ ዎርት ምነ እት እዲነ ቅርዶም ለይኣብደው ወተማዋም፡ እበ ናይ በዲር ዘበንያይ ሸክል ብከእ ዐለም እንዴ ገብእ ለትዳለ ወልኣተላሌ ለህለ እት ገብእ፡ እሊ ኖሱኖሱ ለትመቅረሐ ስታት ኖሱ እሻረት መቅደረት ፍዋር እንዴ ኣብረሀ፡ እት መጃል ሀንደስት ወስታት መዳይን ለክድዋ ኣንፋር ክም መርጀዕ እንዴ ትነፍዐው እቡ፡ እብ ንዩት ሳፍየት ወፍዋር-ኖስ እግል ልጠዉሩ ሰድዮም። ምስል እሊ ለልትመሳሰል፡ ኣግማም ኤረትርየ ወብዕዳም ቤጽሐት ለረይሕ መትመዳን እት ኣፍሪቀ እብ ዐመል ለትረኣ እቱ ድዋር እግሉ እብ ዕንቱም እግል ልርኣው ለቀድሮ፡ ናይለ ሐልፈ ዘበን ታርፌ ዱሉይ እግሎም ህለ። እት መዲነት ባጽዕ ለህለ ቅዱም መባኒመ ክፈል እሊ መትኣንባት ዋወር መዳይን እት ገብእ፡ እግል እሊ ሐዲስ ግም ለረይሕ ቱ። ምስል ናይ ለቀርበ ታሪክ ኤረትርየ ለልትጸበጥ ህይ፡ እት ነቅፈ ወድዋራት ለህለ ኣሳር፡ ዕላቀት ምጅተመዕ ኤረትርየ ምስል መባትክ ምድር ለልኣክድ ቱ። እግል ፍዋር ወባልሐት ኤረትርየን መናድሊን ለሻርሕ ኣሳር ጸብጥ ለህለ ድዋራት መዲነት ነቅፈ፡ ምስል መትጸባዋ እስትራትጅያይ ኣትሐዘዮት ወመትነፍየ እግል ዐስከርያይ ጋራት ለወክል ለትፈናተ መዳፍዓይ ክጡዮ፡

ምን ሐልየት ሐባብ ዐድ ህብቴስ እያሱ ወድ ህብቴስ እብ ክሰሉ መትኣማን እግል መለሀይ ለቤለየ ሐላየት ክእነ ትብል።

መለሀይነ ከደን ፋግራም እት ሕነ ቃዊ ላቱ ቀትሎ ነፍሰነ ሐቆ ፈግርፈት እት ኣጋይድ ነቀሰኖ ኣቅሰንሁ ምንገብእ መን ልብለናተ ትክህሎ ወትጠለቀ ምንገብእ ድመልናመ ተኣክሎ

መለሀይ ለመለሀይ ኣብካቱ ምንዲ ጸንሕ ዲብ ባኩ ምን ልተጌ እስኢኑ ወምንዲ ዐርቅ ለልባሱ ምን ሰፍሬ ነብርሁ ወምን ልትወለፍ ትምባኩ

ኣቡከ መለሀየ ኢለክፎ ክም ብላይ መይት ዲቡ መለሀየ ከበይእ ሐን ለኮክላይ ወረይም ዲቡ መለሀየ ክልታለዮ ለኣምሐራይ ወዐግብ ዲቡ መለሀየ ኣዳም ልግበእ ወንዋይ

መለሀይ ምንዲ ለሐዬ ግምሽ ኢልሰሐቅ ወመለሀይ ምንዲ መይት እት ከደን ኢልሕዶን ልሙቶ እቱ ወልቅተሎ ወሰኒ ልትላቦሶ።

ኣካናት ኣማውር።ሎጀስቲክ ወብዕድ ክድመት እግል ትትሐዜ ለዐለት ናይ መስተቅበል ወጠን እት ዋቅዕ ለበድለ መኣሰሳት፡ እት መባትክ ምድር ነቅፈ እንዴ ትወከለ ለትዳለ ሓጃት ፍዋር፡ ፍንቲት መሰል እት ንዳል ሸዐብ ኤረትርየ እንዴ ገብእ ምህመት ነቅፈ እበ እግል ልትጸበጥ ለቀድር ቱ። እበ ለኢልተምተም መንፈስ ለገብእ፡እትኣድክህላት፡ እስትሸሃድ ፈራሰት ወብዕድ ምስሉ ለገይስ ለወክል፡ እት ኩበድ እሊ ድፍዓት እሊ ለልትረከቦ እት ብንዩት ጅንሰዩት ወጠን ዶር ዐቢ ለተልሀው፡ ሰዋልፍ ክፈል ናይ እሊ ናይ ለመድ ውርስ ድፍዓት ነቅፈ እብ ግብኣቶም፡ ድዋራት ነቅፈ ዒን ዝክርያት ወርይሐት ለክልቅ ደርስ እብ ቀሊሉ ለተሀይብ ዝሕረት ኤረትርየን ኣግማም ቱ።

እት ደንጎበ እትሊ ክቱብ እሊ ቃርብ ለህለ ጽበጥ ዝያድ ዕላቀት ምጅተመዓት ወድዋርም እብ ገበይ ዕልም ኣሳር እንዴ ትረኣ ኣነኩ እግል ልጽበጥ ለኣመመ፡ እብሊ ህይ ኣግማም ኤረትርየ እህትማሙ እት ዕልም ኣሳር ወታሪክ እንዴ ትወቀለ እሊ ወጠን ጸብጠቱ ለህሌት ዝሕርታት ኣሳር ወፍንቲት ኣጅናሰ ጠቢዐት ለሸርሕ፡ ለትፈናታተ መባትክ እሊ ምድር ወድዋር እግል ዓብዮት ለትበገስ ገብእ። ዕላቀት ቅዱም ምጅተመዕ ኤረትርየ ምስል ድዋርም፡ ምን እሊ መፍሁም እሊ እንዴ ትበገሰው እግል ለኣምሮ፡ እብሊ ህይ ናይ ሕበር ፈሀም እንዴ ወቀለው ክል ክፈል ምጅተመዕ ኤረትርየ እት ናይ ለመድ ወጠቢዐት ታርፌታቱ እግል ልኣፍዝ ለኣትሐዜ።





ጋራው ጋራው

ሕግ ሰላማን



10ይት ሰነት ጀሪደት ኤሪትሮፕ ሐዳስ እብ ዕን ሽባብ ወሻባት



ዎሮ ምጅተመዕ ለበበ ርዝቁ ወእንዴ ትመሀጸ ለወልዱ ዝበድ ምን ለሀሌ ሽባብ ሌጣ ቶም፡ ሽባብ እት ክል ወራትለ ምጅተመዕ እብ እዳ ዛይደትለ ብዕዳም እንዴ ትፈረር እግል ለአውቁ አውመ እግል ለአብዱ ለትአቀድሮም ሒለት መዐነውየት ወገሮብ ለመልኮ ቶም፡ እትሊ እቲ ለሀሌነ ዘበን ቴክኖሎጂ ወሐብሬ ህዩ ሽባብ ምህመቶም እንዴ ትዐቤ ወትትርኤ ትገደስ ህሌት፡ እግልሚ እሊ ዘበን እሊ ዘበኖም ሰበት ገብኡ፡ እዲናን እት ሐቲ ንኢሽ ቀርየት እንዴ በደለው፡ ምን ጀፈር እት ጀፈር ምን አውስትራልያ አስክ ሩሲያ አድራሻድ እግል ትርኤ ለትቀድር ወምን ቅብላት ለሀይክ እግል ለሀይ እት ገንሕ፡ “የሀው ሰኒ ሙያም ወሰኒ ማሰያም” እግል ሊበል ለኦቴቅደረ ምህዞ ለወልደው ቶም ሽባብ የም፡ ከእሎም ሽባብ እሎም ሐቆ ክእነ ገብአው፡ እት ክል እዲነ ለህለው እት ገሌ ጥወራት ድወል ህዩ እት ተቅደር እሊ እቲ ለሀሌነ ዘበን ከድሞ ለህለው ሽባብ? ለልብል ሰኣል እግል ልምጸእ ጠቢቂቲ፡ እግልሚ ክል ዶል እት ገበይ ዐቦት ለህለየ ወልሰዕ ምን ድብር ለኢትባልሐየ ድወል እቶም ለህለው ሽባብ ምህመቶም እትለ ዐቦት እሊ ለኢትትርኤ እግሎም ብዝሓም አንፋር እግል ለሀሌ ሰበት ቀድሮቲ፡

ለአማን እት ጥወራት ድወል ለህለው ሽባብ ዝያድ እሎም ለሰሜናህም ሽባብ አብዮት ወመቅደረት ማል ሰበት ረክቦ ዝያድለ እት ድብራት ወእት ገበይ ዐቦት ለህለየ ድወል ለልትረክቦ ሽባብ እት ምህዞት ወአፍሪየት መሻቀዶታት ቴክኖሎጂ ለህለው ምንመ ገብኡ፡ እትለ እንዴ አሰለፍነ ለሰሜናህን ድወል ለህለው ሽባብመ እበ ትትቀደሮም እትሊ መጃል እሊ እዳህም ቅድምት ቲ፡ ምን ፍክር እት ወቀደ ለልትዐደው እቡ በሰር እት ባሰር ህሌነ ልብሎ ለህለው ቶም፡ እምበል እሊመ ለልትመሀዝ ምህዞ እብ ለትፈናት አግቡይ እት እዳህም ሰበት በጽሕ ምን መትንፍዐት እት መፍርየት እግል ልትበደሎ ሳይሆም ህሌ፡

ከእተ አግደ ንቅጠትን እግል ነአቅብል፡ እሊ እቲ ለሀሌነ ዘበን ዘበን ሐብሬ ልትበህል ብህላም ዐልኦ፡ ሐብሬ ህዩ ዒን ክሉ ጋብኡት እቲ ለሀሌነ ዘበን፡ ማል እብ ሐብሬ ልትረክብ ወበርክት፡ ዓፍየት እብ ሐብሬ ተዐቤ ወትትቀደም፡ ሰያስት እብ ሐብሬ ተዐቤ ወትትረሸድ፡ ምህዞ እብ ሐብሬ ልትወለድ ወገናድል፡ ዕልም እብ ሐብሬ ልትረክብ ወፊደሕ ክሉ እብ ገበይ ሐብሬ ልትወቀል ወልትቀደም ብህላም ዐልኦ፡ እሊ ሰበት ገብኡ ክሉ እት ሐንቲህ ኡቲዩ ለህለ ዘበን ቲ፡

ክም መሰል እግል ንንስኡ ለእንቀድር ዶር እዕላም እትሊ ጋር እሊ ቲ፡ እዕላም የም ለልዐርየ ሽቅል ይህሌ፡ እግልሚ

እት ሐቲ ካልኢት ሐቲ ከሊመት እብ ገበይ እዕላም እንዴ ትቃኔት ዶል ፈግር ደውለት እብ ኦካነ እግል ተዐምር አውመ እግል ትደምር ለትቀድር እቲ ደረጀት ባጽሐት ህሌት፡ አዳም ዝያድ ለገብኡት ወራቲ እት ሐብሬ ለተንክበ ጋብእ ህሌ፡ እንዴ ሐብሬ ኢረክብ ህዩ ለገብኡት አምዕለይት ወራቲ እግል ለአግዴ እተ ለኢቀድር ደረጀት እብጽሐ ህሌ፡ እት ምግባይ ምፍጋር ጸሓይ ለህለ ሕሩባት እብ ገበይ እዕላም ልልዳ ለህላ ቲ፡ ወእት እዲነ ገብእ ለህለ እትፋቅያት ሰላም እብ ገበይ እዕላም ለትረክቡ፡ ከእሊ ድቁብ መሻቀዩ ዶል ተሐዘ እት ሰም ወዶልመ ህዩ እት ጥዑም እግል ትብድሉ ለትቀድር እዕላም ሕናመ እት ክብዱ ነሐምብሰ ሰበት ህሌኦ፡ እንዴ ተዐንደቅናሁ እግል ንዳፍዕ እቡ ሐቆ አገብኡነ እት መቅደረት ወፊህም ሽባብ ሰበት ልተንክብ፡ ሽባብ እትሊ መጃል እሊ ለህለ እግሎም ፈህም እንዴ ትወቀለ እት ክል ወራት እግል ለሀሌ ዋጅብ ቲ፡



ኤሪትሮፕ ዐድናመ እበ ትትቀደረ ምስል እሊ ዘበን ቴክኖሎጂ ወሐብሬ እግል ተአሳድር ምንመ ኢቀድረት፡ እብ መልሃየ እት ታክብ ለባጽሐት ህሌት ደረጀት እት መጃል እዕላም ደሐን ተ እግል ኒበል እንቀድር፡ እግልሚ እንዴ ትክተብ ለልትወሰቅ፡ እንዴ ትቃና ለልትሰመዕ ወእንዴ ተዐፊ ለልትርኤ መጃላት እዕላም ሰበት መልክ ቲ፡

እሊ ሌጠ እንዴ ኢገብኡ፡ እብ ገበይ ሽበክት ኢንተርኔት ምስል እዲናህ እግል ትትሓበር ለሰደያመ ክፈል እዕላም ምጅተመዕ ቲ፡ ምን ለልትሰመዕ ወሰልትዐፊ ለልክተብ ሰበት ልትወሰቅ እትሊ መጃል እሊ ህዩ ሒለት ዳርሳም ሽባብ ምህመት ዐባይ ሰበት ተህሌ እግሉ፡ እትለ ንቅጠት እንዴ ተንክብኽ እግል ንናቅሽ ክም ብነ ለአትፋቀደት መናሰበት 10ይት ሰነት ጀሪደት ኤሪትሮፕ ሐዳስ እት የም 10 ማርሰ ሰነት 2018 ለገብኡ መሐበር ጎማት እቲ እብ ዋድሕ እግል ልትኣከድ ቃድር ህሌ፡

እሊ ዘበን፡ ዘበን ሐብሬ ሰበት ገብኡ ምስል ዐለምን እብ ዓዳትኦ ደያናትን ሰዋልፍን ወብዕድ ዝሕርታትን እግል ንሄርር ወመትቀዳም ሀገጊትን እግል ነአከድ ለትሰዴ ዳርሰት ወምሀዘይት ሒለት እግል ተህሌ ለልትላኪ ዘበንቲ፡ እትሊ ምስል ክል ካልኢት ልትባዩእ ለህለ ሕሩባት ዓዳት ወሰዋልፍ ምጅተመዕ

ለትዳፍዕ ገላብ እንዴ ገብኡ ለክድም ሽባብ ዝያድ ለገብኡ ነፈር ልትሐዘው ህሌ፡

እተ መሐበር ጎማት ለሐድረው ሽባብ ወሻባት እብ ዕምር ወደረጀት ተዐሊም ለትፈናተው ምንመ ዐለው፡ ፈህምም እት መጃል ሐብሬ ሐቲ ሰበት ዐለት፡ ለመናሰበት እንዴ ትንፍዐው፡ እግል ጀሪደት ኤሪትሮፕ ሐዳስ ለነፍዕ ንቀጥ እት ቀደሞት ይሐወነው፡ እግልሚ እሊ ጀሪደት እሊ እብ ንሳሎም እንዴ ትሃኒት፡ ከሊመተ ለኢትመይት እንዴ ኢትገብኡ፡ ከሊመት ወሰዋልፍ መትሃግየተ እንዴ እቲ ሓፈዘት ታሪክ ሰዋልፍ ወእሱል ቀዳምያም ክም ዝሕረት እንዴ ሐየበት፡ እት ብዕዳም እግል ልትዐዴ ለትሰዴ ወሲቀት ዳይመት ሰበት ገብኡት፡ እበ ህሌት እግሎም መቅደረት እግል ዐቦተ ለሰዴ ንቀጥ ሰኒ እንዴ ቀደመው ገሌህም እንዴ መጃምያም ወክለው ለአቀናቡ እት ህለው፡ ገሌህም ፍክሮም ወረኣየም እብ ገበይ ሽዕር ወሕላይ ሓላፊዉ ዐለው፡

ሻቦት እመነ ሙሰ ምን ንእሻ ምስል እዕላም ለዐቤት ሻቦት ሰበት ገብኡት፡ መጃል እዕላም እት ደመ ለትሓበራ ቲ፡ እሊ ክእነ እት እንቲ እት ብዕድ መጃል ምንመ ትትፈረር ምኦ፡ ክል ካልኢት ተሐሰስ እቡ ለህሌት ቲ፡ እብሊ ህዩ ምስል ብዕደት ወራት እንዴ ጨምሮቲ እግል ትሄርር እቡ ቃድረት ለህሌት ሻቦት እግል ኒበል እንድር፡

ህተ እት መናሰበት ጌማም 10ይት ሰነት ጀሪደት ኤሪትሮፕ ሐዳስ ሽዑረ እብ ገበይ ሽዕር “ኤሪትሮፕ ሐዳስ” እበ ልብል አርእስ መገባነ ጀሪደት ኤሪትሮፕ ሐዳስ፡ መዳንን ለእግሉ ደንን ወመዋል ለእግሉ ትፈግር፡ በሐር እንዴ ተዐዴት እብ ገበይ ሽበክት ኢንተርኔት ለትበይኡ አድህይ ወለተሀይቡ ደሀይ ክሉ እብ ክርንት እት መናሰበት ሓድራም ለዐለው ዕዙማም ጋሻ እግል ተአብጽሕ ሰልፍ ምን ዕዙማም ለዐለው ሽባብ ወሻባት ገብኡት፡

እሊ ለልሐብሩ ምን ለሀሌ እሊ ጀሪደት እሊ ዝያድ እግል እሎም ሽባብ ወሻባት ለትትበጽሕ ክምታቲ ለልኣክድ፡

ግረ እመነ እብ ዕምር ምንመ ነአሸየ እት መስተቅበል ዐጃይብ እግል ልሸቀየ ለቀደር ሻባት ክም ተን ለኣከደየ ነጅላ መሐመድ ሰዲድ ዑስማን ወአማል መሐመድ እድሪስ ለመድ ቅራኣት

ምጅተመዕ እግል ክቲብ ወጀራይድ ወእብ ፍንቱይ ጀሪደት ኤሪትሮፕ ሐዳስ እግል ልዕቤ ወልትቀደም እግል ልትጠወር ለቡ ፈህም እግል ለሀሌ እግልኦ፡ እበ እንዴ ኢልትፈህመክ ምክ እግል ሊበእ ለሰዴ ብሰር ፈን ሰበት ቀደመያሁ፡ ክል ነፈር እብላ እት ልሰሐቅ ወእብላ ህዩ ርሐ እግል ልሰኣል ለአቅደረ ጽበጠን እለን ናይ የም አግሩዝ ፈጅር ላኪን እት 20 ሰነት ጀሪደት ኤሪትሮፕ ሐዳስ መሰኡልየተ ለረፍዐየ ሻባት እንዴ ገብኡየ መቅደረተን ወፍጥረን እትለ ጀሪደትን ክም ለአርእያህ ደማንት ብዩ፡ እግልሚ እትሊ ዕምር እሊ ወእትለ ደረጀት እሊ ፈህም ቅራኣት ጀሪደት ወእብ ፍንቱይ እሊ ለእብ ሂገ እመን ለትዳሌ ጀሪደት ኤሪትሮፕ ሐዳስ ብገሳት ሰበት ህለያቲ፡

ሻብ መሐመድ እድሪስ አድም ነፈር ቅዋት ድፊዕ ቲ፡ ህቲመ እብ ክሰሰ እሊ ጀሪደት እሊ ወለገብኡ መሕበር እበ ክሰስ እብ ከሊማት ቀዳምያት ወፈልፈሰት ለትግረረት ሽዕሩ እንዴ ጸብጠ ማጽእ ለዐለ ሻብ ቲ፡ ለሽዕሩ እት ብዕድ ዐዋሚድ እሊ ጀሪደት እግል ልትቀደም እግልነ ሰበት ገብኡ፡ እብ ክሰሰ ጀሪደት ኤሪትሮፕ ሐዳስ ለሀህናቲ ረኣይ እቲ እግል ንትዐዴ ብኩም፡ ጀሪደት ኤሪትሮፕ ሐዳስ እግልነ ሽባብ እብ ዓመት ወእት ቅዋት ድፊዕ ለሀሌነ ህዩ እብ ፍንቱይ ዒን ክሉ ቲ፡ ጋራትን ለተሀርሱ ሓላት ዐድነ ለተሐብረነ ወዓዳትን ለተአደርሰነ ዒን አምር ቲ፡ እሊ ሰበት ገብኡ ኣነ እግል ኢትሕለፈኒ እብ ናዩ መባደረት ክል ዋበዐት እግል እርክብ ለእቀድር እበ ገበይ ቡሱር ዐልኮ ወህሌኦ፡ እሊ ገበይ እሊ ህዩ ብዕዳመ እግል ልትንፍየ እበ እንዴ እቤ እት ነቅፈ ለህለው ሽባብመ እሊ ናዩ ገበይ እግል ልተለው ጅህድ ወዴኦ፡ ምናተ ክምሰለ ልትሐዘ ይዐሉ፡ ሰበት እሊ ጀሪደት ኤሪትሮፕ ሐዳስ ናይነ ሽባብ ሰበት ገብኡት ክል ሻብ እግል ልርክበ እብሊ ህዩ መቅደረቲ እግል ልዓቤ ወልሻርክ እት ምህምቲ ቤሌ፡

ሻብ ሰዲድ መሐመድተር ቀይሕ ወድ ቀይሕመ ምን ቅዋት ድፊዕ ኤሪትሮፕቲ፡ ህቲመ እብ ጀህቲ ጀሪደት ኤሪትሮፕ ሐዳስ እት ክል ድዋር እግል ትብጸሕ ወሽባብ ምነ እተ ለህለ ዝሕርታት እግል ልትረዘቀ ኖሶም እተ እሊ ህሌት እንዴ መጸወ እግል ልትዛበመ እንዴ ትፋኦ፡ እግል ጀሪደት ኤሪትሮፕ ሐዳስ ለትሸርሕ ሽዕር ምነ ቀደመው እግል ሽባብ ገብኡ ዐሌ፡

ሻብ ፈናን ወሰሕሬ መሐመድ ዳፍላ ምነ እት ዐቦት ጀሪደት ኤሪትሮፕ ሐዳስ ለከድሞ ሽባብ ቲ፡ ህቲ ምስል መጅሙዐቲ ለናቀሸ እቲ እግል ዐቦት ጀሪደት ትግራይት ለነፍዕ አራእ እንዴ ጸብጠ እት መሰረሕ ለዐርጋቲ፡

ምነ ቀደመየ ንቃጥ ገሌ ዶል እንርኤ፡ እት ዐሙድ ለልትከተብ አሰማይ ኬትበት ወዕንዋን ዓሙድ እት ራትዕ አካናቲ ምንገብኡ፡ ሰወር እተ ራትዕ አካናቲ ምን ልኣቲ፡ ሽክል ሎጎታት ዎሮ ምቅደስ ምን ልትህየቡ እግል ጀሪደት ለሽክል (ላይ አውት) ለወዴ ነፈር እግል ለህሌ፡ ትሉሉይ ኮርሳት ወተሐደስ ተሓምቅ ምስል መሸክለት ብዕዳት ጀሪይድ እግል



ልግበእ፡ ለልብ ወብዕድ ንቃጥ እንዴ ቀደመ፡ እግል ዐቦት እሊ ጀሪደት ክል ሻብ ረኣየ ወፍክሩ እግል ለሀብ ረኣይ ምሽተርከት እግሉ በክት ፈትሐ፡

ሻብ ደክቶር ሳልሕ መሐመድ ሰዲድ (ነግዳይ) እብ እንክሩ እብ መጅሙዐቲ ለትረክበ ንቃጥ እግል ዐቦት ጀሪደት ኤሪትሮፕ ሐዳስ እንዴ ጸብጠ እግል እተ ጌማም ሓድራም ለዐለው ምሽተርከት ለቀደመ ዐሌ፡ እት ጀሪደት ለህለ ዐዋሚድ እግል ክሰሱ ክፈል ምጅተመዕ ለነፍዕ ወለወክል እግል ልግበእ በሀለት ናይ ሽባብ እግል ሽባብ ለክሰስ መዋድዕ፡ ዓሙድ አጀኒት እግል አጀኒት ለክሰስ አግዓሚቶ ወብዕድ ሐካኪቶ ወለመሰሉ፡ ወሐዳይስ ዐዋሚድ ክም ከረ እግል ቁርኣት ገበይ ነቅድ ለልኣጠፍሕ፡ ወብዕድ እግል ለሀሌ እተ ምህም ወእግል ትትቀም ለሰዴ መርበይ ክምቲ ወሰኩ፡

እብሊ ህዩ ጀሪደት ኤሪትሮፕ ሐዳስ



እተ እት ተዐሊም ለህለው ሽባባት እግል ትብጸሕ ውዛረት ተዐሊም፡ እት ሽቅል ለህለው ህዩ እብ ገበይ ብዕዳት ውዛረት ወመሓብር ክምሰልሁመ አፍራድ ዶርም እግል ልዓቡ ምን ክል እተ መናሰበት ሓድር ለዐለ ሻብ ለቀርብ ወሰያኣት ተንክረ፡

ጌማም 10ይት ሰነት ጀሪደት ኤሪትሮፕ ሐዳስ እብ ዕን ሽባብ ዶል ትርኤት፡ ጀሪደት ኤሪትሮፕ ሐዳስ እግል ትትቀደም ወመጦር ሰናተ እግል ትግበእ ሽባብ ክም ናየም ምህመት እንዴ ረኣወ እግል ልክተቦ እትእግል መሳክበት ትብጸሕ ሰምን እግል ሊባሉ፡ ወእንዴ ቀርኣወ እግል ዐቦተ ለሰዴ እብ ዕን ነቅድ ለቀርብ መሻረክት ፍንቲት እግል ሊደው እተ ክም ወጅቦም ለኣከደት መናሰበት እት እንተ ትረክበት፡





ልግብ

ዎሮት ከእብ ገበዩ ሌጠ ለአሴርር

ሐቲ ዓይላት እግል ትትፍሰሕ አሕድ እንዴ ጸብጠት አስክለ ብሩር ትፈረረት። ሐር ነብረ እግል ትበለዕ እብ ሕበር እንዴ ተዐገለት። ወክሉ ባለ እት ነብራህ ዋድዮቱ ዲብ እንተ። አመተ ለይዐለት እለ ወድ ሰነት ወሰር ለገብእ ጀኔታይ እት ልሽሐግ ጠበሽ እንዴ ቤለ እት ጢሾህ ምስሉም እንዴ ተዐገለ እት በሌዕ አንበተ። ለጅማዐት እለ ጀኔታይ እት ክም እለ መስል አካን ወእት ከደን ብራቁ። ወአዳም አለቡ ምስሉ ክም ረአዉ ሰኒ ትፈክረው።

ለድግለሊትለ ዐድ ሰኒ ረሕመት እቱ ወዶል ከልቅመቲት አሰር ልቅመቲት እት ለውሽ እሉ ወእት ተአበልዑ ወተአሰትዩ አንበተት።

ገሌ ምነ አንፋርለ ዐይላት እንዴ ጌሰው እትለ ባካት አዳሙ ምን ረክቦ እንዴ ቤለው ተሐት ወለዐል ቤለው። ምናተ ዎሮትመ እግል ልርከቦ ሰበት ኢቀድረው። ሰሮም ጅን ቱ ገብእ አዳም እንዴ መሰለ ሐብሮም ሀለ ቤለው ወእግለ አቦቶም ተረግ እግል ተአብሉ ጠልበው ምነ። አቦቶምዲ ሰምዖም አቤት ወእተ ጀኔታይ ሕንዝባ እንዴ ገብአት ተአበልዑ ወተሰትዩ ወአስክ ምስእላዩ መጽእ እብ ዛይደት ረሕመት ምስለ ጸብጠቱ።

ምድር መሴ ወለዐይለት አስክ ዐድ እግል ትዲር ትዳሌት። ለጀኔታይ ህዩ ሐቀለ ነብራህ ለእለ በልዐ እት ሰካብ ሰኒ ትሩድ ትከረ። ለድግለሊት ምስልን እግል ንንሱኡቱ ቱለቶም። ምናተ ለብዕዳም አንፋርለ ዐልይለት መትከባተ አበው። ወእግል አቦቶም። በልዐ ወሰተ ወሰክብ ሀሌ። ምን እለ ወኪን ሚ ለሐዜ አዜ። ሐር ህዩ ዐይለቱመ እት ተሐዝዩ ትመጽእ ትገብእ ምን አመረ። ወምን አመረ የምክን ጅንመ ገብእ ኢኮን። ጅን እብ ደሐኑ ምን ገብእ

ዲ እለ ከደን ብራቁ እብ አዩ እግል ልምጽኡ ወቀድረ። ሐር ህዩ ጅን ገብእ ምን ገብእ ሕነ እብ እዴ ኖሰን እንዴ ረፍዐነ ሸፍርን ነኣትዩ ቤለው። ለድግለሊት ሐቀ እለ ሀገጊትለ ውላደ እንዴ ሰምዐት ትም ትቤ። ዐድ ክም ዲርን ፖሊስ እግል ነአሰእል እሉቱ ወክፎ ክም ልትቃርሕዎ ህቶም ኖሶም ለአምሮ ቤለው።

ለእሲት ድግለሊት ለጀኔታይ ተማም እንዴ ነጻፈት እሉ ሰኒ ከድነቱ ወእተ ምትክራሩ እት እንቱ እብ ረሕመት እት በኬ ዲቡ ተ ከደኑ እት ባዶብ እብ በይኑ እንዴ ሐድገዉ አስክ ዐዶም ትወረበው ምነ።

እት ቀደሚሆም አስክለ መርከዝለ ፖሊስ እንደ ሸክፈው ለጋር ደግመው እሉም። ወለጀኔታይ ወለ እት ሀለ አካን አሰአለም። ወዎሮት ምነ አንፋርለ ዐይላት አነ ምስልኩም እንዴ ጊሰኩ ለአካኑ ኖሼ እግል እምረሐኩም እታቱ ቤለዮም።

ምዕል ሓሪት ምድር ክም ጸብሐ። ለፖሊስ ምስለ እናሰ አስክለ አካን ለጀኔታይ ዐለ እት አግወሐው። እት ምትክራሩ እት ሰክብ ጸንሐዮም። ፖሊስ እትለ ባካት ተሐት ወለዐል ቤለው። ወሐር አሰርለ ምሽሓጉ እንዴ ተለው እት ለሐዙ አንበተው። ሐቀ መሳፈት ረዶም ጌሰው ለቦሊስ ሐቲ መኪነት ድሩግት ረአው። እንደ ቀርበው ምን አቅመተው ሰዋግለ ዐረብዩት ወእተ ባኩ እሲቱ ማይታም እት እንቶም ጸንሐዎም። ከለሓድሰት ተማም ክም ትፋጠነው ቀደም ገሌ አምዴላት ክም ሐሰለት። ወለጀነ አምዕሉ እንዴ ደሐረት ምነ ሓድሰ ክም ነገ አመረው። ዐጃይብቱ ረቢ ሀሌክ ለቤለዩ ዎሮትክ እብ ገበይ ልሄርር።

ዝበድ ዘየታት

ለመረ ተዩልል እዲነ። እንተ ምነ ሕጉዝ እትክ ላቱ ወእንታመ ምነ ወለዐል ሕጉዝ እቱ ለዐልከ ነፈር ዶል ተአረይም። ወአስክ ያሬት ኡሙር ምስሉ ምን ይዐሌ ለትብል ደረጀት ትበጹሕ ቱ። እለ ትዕስ እለ ህዩ ሰበት ህቱ ምስምስ መጢጠትክ ገብእ እንዴ ኢትገብእ ዐደድ ለአመጠክ ሰበት ረይሐካ ቱ።

ለለአትፈክር ሐቃይቅ

ዲብ እለ ናይ እዲነ ዘሕመት። እት ክል ምዕል የም ለአለቡ ሐብሬታት እብ ክሰሱ ጁቅራፍዮት ሲያሰት ወዓፍዮት ልትቤበር። ምናተ ሕናዲ ብዞሕ ኢነአምሩ ወምን እለ ወኪንመ ሰሩ ሰኒ ጋነ ገብእ እትነ። ክምን እለን ሐቃይቅ እለን።

- አንጃብ እት አፍ ሌጠ ኢኮን ለበቅል። ህቱ እት ካልእ ከፈፍል ገሮብ ክም አንፍ ዕን ወአስክ እት ሐግነትመ እግል ልብቀል ቀድር። ወእለ ህዩ እብ ሰብብ ገሌ ሕባጥ ለትፈናተ ሴላት ወሕባካት ለከምክም ቱ ለጀሬ።

- ዲብ ዓሰመት ፈረንሰ ሐቲ መቅበረት ዐጭሞታት

6 ምልዮን ነፈር ለትከምክም ህሌት። ወእብሊ እለ ለዐቤት መቅበረት እትለ እዲነ ትገብእ። ሕኩመት ፈረንሰ እግል እለ መቅበረት እለ ብዞሕ እህትማም ሰበት ተሀይቤ። እት ሰነት 2014 አትሳነዮት ዋድዮት እተ ዐለት።

- ካልእ ምን ክም እለ ለመሰል ሐብሬታት ለትከምክም ቃእመት ለትነሰአት መዕሉመት። ረኢስ ውዘራእ እሰራኤል ለዐለ ዳሺድ ቀርዮን። እግለ ወድ አልማንዩ ላቱ ዓልም አልበርት ኤንሽታይን ረኢስ እሰራኤል እግል ልግበእ ጠለብ ቅዱም እቱ ዐሌ። ምናተ አልበርት ኤንሽታይን እግል እለ ጠለብ

እለ ኢትከበተዩ።

- ዲብ ያባን ህዩ ጀዛይር ካምላት ደመሚት ዕልበን ምን ዕልብ ውላድ አደሚ ዲብ እለ እዲነ ለነብሮ እብ ሰስ ዕጽፍ ለበዜሕ ለነብረ እተን ህለዩ። ወዝያድ ክለን ለትትአመር ህዩ ጀዚረት አሺማ ተ።

- ዲብ አምሪካ ኖሴ ውልያም ፍሊፕ ገሌ ምነ እት እዲነ እሙራት ወክሉ ለሸቄ እበን ናይ ሐረከት እሻራት ወላፍታት መሀዘ። ምናተ ህቱዲ ዲብ ክለ ሐያቱ ሐቲመ ምዕል ሰዋገት ዐረብዩት እግል ለአምር እንዴ ኢልትዐወት ሓለፈዩ።

- ዲብ ሰነት 2011 ዎሮት ሐኪም አንዶብ ላቱ ሐቲ ምን አንዶብ ጆን ዮን ለልትበህል ፈናን እብ መዛዩደት እብ ዐውል 30,500 ዶላር ትዛቡ። ሀደፉ እለ ውዳይ እለ። እት ወቅት ሓር ለነወውያይ አሲድ ናይለ ኒብ እቡ እንዴ ትነፈዑ። አክል ሕድ እግል እለ ፈናን እለ ለትመሰል ንስከት እግል ለአትዳሌ ምን ሐዛ ቱ።

በህል እ'መራም

- “ለውቀት እት ጠምጠም ፍሬ ወቀይክ ወለእሉ ሰርገልገ መጻግም ወእተ እሉ ወዴክ ጸገም ወለእለ ክዴክ ለሀበት ለትረክቡ ሰሩር ወፈርሐት ተ ልትረከቡ።” (ሮዝፈልት)

- “አደብ በህለት ምን ነፍሰክ ዶል ተአስተሕዬ ቱ” (እፍላጣን)

መዕሉመት

- ወድ አደሚ አክለ ደረጀት ፈጣነቱ ትወቀለት ተ። ለምን ብዕዳም ትሳድፉ እሃነት እት ለአመሸሽ ምነ ወበሊስ እት ከለአ መጽእ። እለ ህዩ ህቱ ሒለት ሰበት ሰአነ እንዴ ኢጉብእ። ህቱ ዐደድለ እሃነት ወጅህ እቱ ሀለ ነፈር አክል ሕድ ሰበት ለአምር። እንዴ አምሸሽ ምነ ሕሽመት ርሐ ለዐቅብ ወምነ ገበዩ ሸክፍ እሉ። ነፈር ፋጥን እሃነት ብዕዳም ኢልትሃለግ እተ ወእግል ልብለስ እታመ እብ መሕገዝ ኢልሽዕር። እለ ህዩ ለእለ ወጅሆ እቱ ህለው እሃነት ህቶም ዐደድ ሚ ክም ቶም ለተሐብር ሌጠ ሰበት ተ።

በህል

- አዳም ብዙሕ እንተ ምናም ሰበት ተሐይሰ ሌጣ ቱ ለለአቡኩ ከ ባል ኢተሀቦም ዐውቲክ ሌጠ አተላሌ።

- አደብ ሰኒ ለሐሰ እት ወቅት ቅዶብነ ለዳሬዕ እግልነ ሰላሕ ቱ።

- ምስጢር ለውቀት እተ እሉ ንትሸነህ እንዴ ኢጉብእ። እብለ እት እዴነ ህሌት ዶል ነአገኔዕቱ ለልትረከብ። ሸንህት ወድ አደሚ ቅዶስ አለቤ።

- ሐምቅ ላቱ ነፈር አባይ ሐዮት ወምጅተመዕ ሐቀ ገብእ። በክት ረክበ ምን ገብእ እት ከራይ ሳርዐት እግል ልትበደል ቀድር።

ተበሰም

ዎሮት ግሉል እግል እሙ እንዴ ነቅመ። ይመ ዮም ላተ ሰኒ ፍርሒ እግልኪ ቤለዩ። ህተ ህዩ ፋሬሕ ለአሰእለክ ክሚ ረከብክ እግልዬ ወልዩ? ቱለቱ። ህቱ ህዩ ሬሲሸር ትዛቤኮ ቤለዩ። እላቱ..ከረቢ ሰዴክ ኢኮን። ምናተ ለማል ለእቡ ትዛቤካሁ ህዩ ምን አዶ አምጸኣካሁ? ቱለቱ። ህቱ ህዩ እት ልትፋወሽ.. እግል ተለፍዝዮን አዝቤኮ ቤለዩ።

ጣዓም

“እት መከማትት ለገብአት መሲበት በክት ዐቢ ህለ።” ከእለ እዲነ ደብር ወቀላቅል ሰበት ተ። ደርገተ ምን ገብእ ክም ወአት ሐቲ ዶል ገርመሕ ኢቲበል። ለገብአት ሓድሰት ምስምስ ወጅህት ክም በ አምር። እለ አማን እለ ህዩ በዐል ዐቅል ፈዳብ ወነፍሰ ሃድአት ሌጠ ፈጥነ። እለ ምስምስ እለ እት መከማትተ የም አለበ ረሕመት ወሕክመት ክም ሸምል። ምናተ ቀደር እንዴ ገብእ ለተዩልል እለ ገበይ እለ እግል ልተሌ ክም ትቀሰበ ፈሀም። ከእንተ አዜ እተ መከማትትለ ምስበትክ ለሀለ በክት እሰውቱ ፈትሹ። ከረከብካሁ ምን ገብእ። እምበል ሸክ ለምሲበትክ ዲብ ዐቢ ብዶሆ እግል ትበድላ ክም ቱ ሸክ ኢትውዴ።



መሕበር ጎማት ኤረትሮፖ ሐዳስ 10^{ይት} ሰነት



አሰይድ ሰለሙን በርሄ

እት የም 2 የናይር 2008 ሰልፋይት ጥብብተ ለአስተብዳት ጀሪደት ኤረትሮፖ ሐዳስ፡ ሄራር ቡቅድ እት ተጃርበ እግል ትቀይም፡ እት የም 10 ማርስ 2018፡ ዲብ ቃዕት 'ሃገር ሚድያ'፡ ምን አቃሊም ለትወክለው፡ ሰብ ሰልጠት ሕኩመት፡ ኬትብት፡ ቁርአት፡ ዳርሳም፡ ዕጋል ዐባዩ ወሕሱራም ለአሻረክ መሕበር ጎማት ወዴት።

ኤረትሮፖ ሐዳስ እትሊ ሄራር 10 ሰነት፡ ለዐለ እለ ጀዋንብ ፈዳብ፡ ነዋቅስ ወአግቡይ ተውዝዐ እግል ተአዋፊሕ ለሀደፋ፡ ምስል ቁርአት፡ ኬትብተ ውብዕዳም እት ህግዩ ትግራይት ለልትሐሰሮ መሻርከት ለሐቅፈ



ኤሰይድ ዳንኬኤ ዐቅቤ

መሕበር-ጎማት ትወዴ እት ህሌት፡ ዝያደት እግል ደቅበ ለሰዴ አረእ፡ ክምስልሁመ ለዲብ ተውዘዕ ህሌት እለ ሰበር ጀላብ እግል ትትዐዴ ለሰተተ ዝያድ 60 ነፈር ለአሻረክ ዐለ።

እት እግል ሐቲ ምዕል ለገብአ መሕበር-ጎማት፡ ሕሱራም ዳርሳም ወዕጋል ህግዩ ትግራይት፡ ጀሪደት ኤረትሮፖ ሐዳስ ጠውር ወቀደም ለአብል ለቤለው፡ እት 4 መጃሚዕ እንዴ ትካፈለው ልግበእ ወእብ ረአዮም ወፈናታቶም፡ ሐበት ኢጠምዐው ምን። ክምስለ በዲር ታቲ ለአበለው፡ የም ሐቆ 10 ሰነት ለቀደመዉ አፍካርመ፡ እት ዐቦተ ወሽንገሎተ አሳስ ትፋድ ወለኢትቀንቀን ሽከረት ክም ገብእ አኪድ ቲ።

ለበርናምጅ እብ ዝክረት ሹሀደእ ክም አንበተ፡ ለትፈናተ ከሊማት ትቀደመ። መዳልያይ ጀሪደት ኤረትሮፖ ሐዳስ አሰይድ

መሐመድ እድሪስ መሐመድ እት ቀደመዩ ከሊመት፡ “ቀደም ዐስር ሰነት እትለ የም ጅምዓም እት ለህሌነ ቃዕት ሃገር ሚድያ እንዴ አምሐበር፡ እት እብ መናሰበት ዕግል ትግራይት እት ዔማት አክባር ለወዴናሁ መሕበር ጎማት፡ እት ታሪክ ክትብት ወቅርእት ትግራይት ዲመ ለትነብር ምስዳር ትነሰአት። ምን እት መሕበር ጎማት ለህይ ለሐልፈ ፊናታትለ ህይ ውዛረት እዕላም እብ ትግራይት ጀሪደት እግል ትዋበዕ ለልብል ዐለ” ክም ቤለ፡ ለሰታት ወፊነ ወዕለ እት ዶሉ ውዛረት እዕላም መስኡልየት እንዴ ረፍዐት ጀሪደት ክም ትዳሌ ክም ወዴት፡ ወእብሊ ኤረትሮፖ ሐዳስ መጦርለ ቀደሚህ ልጠበዐ ለዐለየ ሰለስ ጀራይድ ወጠን እንዴ ትረተበት ራብዐይተን ክም ገብአት፡ እለ ምስዳር እለ ህይ እት ታሪክ ትግራይት ምስዳር ዐባይ ወእግል አግማም ክብት አው ሚራስ ክም ተ ወደሐ።

ኤረትሮፖ ሐዳስ ህይ እግል ኩሎም ክቱብ እግል ልታይኖ ወልባሕሶ ለልሐዙ፡ እት መክተባት እንዴ ንሰው፡ ሸበካት እንተርኔት ወመክተባት ዲጂታል እቲ ዔማት መርጀዕ ጋብአት እሎም ክም ህሌት እት ለአፍህም፡ ምኒን እግል ዐቦተ ለትሐዝዩ ጋራት ህይ፡ ዐገብ፡ ረአይ ውብዕድ ብዙሕ ሰበት ቲ፡ ጋመተ እግል ነኣትምም ወጭዊተ ነኣርቴዕ አዜመ ሰእዮብ እትነ ምሽተርከት እሊ መሕበር-ጎማት ክም ህለ ወደሐ።

መስኡል ቅስም ፕረስ አሰይድ ሰለሙን በርሄ እት ቀደመዩ ከሊመት ህይ፡ “ዔማት አክባር ሕርርት ደውለት ኤረትሮፖ፡ እት ወክድ ንዳል ለአንበተ፡ ምን ቀዳሙ ዐዳለት እጅትማዕየት እት ልተበዕ ሸፍር ለዔረ እት ገብእ፡ ህደፍ ውዛረት

እዕላም ዲቡ እንዴ አተንከቤ አብካት መሳዋቲ፡ ድቅብት ውሕደት ወጠን ለቡ፡ ሸዐብ ጥዉር ወመስኩበት ስዖሰቲ ለመልክ፡ ዐዳለት እቅትሳድ ወእጅትማዕየት ለትመደደት እቲ መጅተመዕ ዲብ ብንየት ተረት ዛይደት ለቡ፡ ጥዉር፡ እሙን፡ ሕር ወመስኡልየት ዐማር



አሰይድ ክልሹም መሐመድ

ለክሪት እቲ ወሳእል እዕላም አንሸአት ቲ” እት ልብል፡ ምስል ራድዮ ክርን ገቢል ፈሬዕ ትግራ ሕቅፍት እት እንተ እብ ሰማን ሰፍሐት ለአስተብዳት ኤረትሮፖ ሐዳስ፡ የመቲ ሰፍሐት እት 12 እንዴ ትወቀለ፡ ሕዳን አዳም ምንመ ቤ እብ መዕጸም አንፋረ እምበል አትካራም ዝያድ 530 ጥብዐት እትሊ ዐስር ሰነት እንዴ ጠብዐት፡ እት ወሰቆት ታሪክ ወአበርካት ዝሕረት አምር ክቱብ ትግራይት ሐዞት ዐባይ እግዲት ክም ህሌት ሸርሐ። ክም ኩሉ ቀደሚህ ለአንበተ ዝሕርታት ራድዮ፡ ተለፍዝዮን ወጀራይድ እብ ሸበካት ሐብሬ፡ እት ኩሉ አርካን እዲነ ትበጹሕ ክም ህሌት እሊ ህይ መትመዳደ ወመትቀረኣ ለልአስሐብብ ወጠውር ክም ቲ አክደ። “እት ሐልፈ ሄራር ዐስር ሰነት ለትረከበ ተጃርብ ሰኔ እቲ እንዴ ተረድኩ፡ ለዐለ

ነዋቅስ እንዴ ሸ'ክከ እት ዐቦት ጀሪደት ኤረትሮፖ ሐዳስ ለሰዴ አፍካር እግል ተአተንክሮ ዲበ ሰእዮቼ ቲ” ቤለ።

መወዘዓይ ጀራይድ ወመጀላት ኤረትሮፖ አሰይድ ዳንኤል ዐቅቤ እብ ጀህቲ፡ “ተውዘዕ ጀሪደት ጀሃት ብዝሓት ለሸምል ሰበት ቲ፡ መወዝዐትመ መትከብተት ወቤልሰት ለሐዙ። እት ጀሪደት ኤረትሮፖ ሐዳስ ለእንርእየ ሰበር ተውዘዕ ህይ፡ ለእግል ትብጽሑ ወጀብ ሸበበ ምን አግቡይ መካይን ወመዋሰላት በረ ላቲ ብሩር እቲ ሳክን ምን ገብእ ሌጣ ቲ ድኢኮን፡ ጠለብ እንዴ ሰአነት ወጽበጠ እንዴ ሐወነ ኢኮን። ጽበጠ ለትደቀባ ቲመ እግል ኢበል እቀድር” እት ልብል፡ ምስል ናይ ሕኩመት ወኢሕኩመት መካትብ ክም ውዛራት ተዕሊም ወድፈዕ፡ ክምስልሁመ መሓብር ሸባብ ወአንሳት እት ልትዓወኖ ዲብ ዘባይነ ለአትባጽሕወ ዱልያም ክም ቶም ወደሐ።

ሐቆ እሊ ኩሎም መሸተርከት እት መጃሚዕ እንዴ ትካፈለው፡ ናይ ክልኤ ሳዕት ንቃሽ ክም ወደው፡ ምን ገጽ ምሴ ክል መጅሙዐት ለሐየበቲ እት ጀሪደት እግል ልትዋሰክ ወልንቀስ ለቡ ጋራት ልግበእ ወንቃዋ እግል ሓድራም ቀደመቲ። እትሊ




አሰይድ መ/እድሪስ መሐመድ

ለኢወድሐ ጋራት እብ ሰኣል ወአረእ ተውዴሕ እት ልትህዩብ እቲ፡ መጃሚዕ ምስለ መሸተርከት ሸሙይ ናቀሸየ ዲቡ።

እት ደንጎበ አክል-ሕድ ሳዕት 4:00 አልዐስር ወዚር እዕላም አሰይድ የማኔ ገብረመስቀል፡ እግለ ናይ ሐቲ ምዕል መሕበር ጎማት፡ ዓደት ደብእ ወደ እሉ። ወዚር የማኔ እት ቀደመዩ ከሊመቲ፡ “ምሽተርከት ወዕለ ለትህዩቡ አፍካር፡ መዋልያይ አሰክ ዐቦት ኩሉ ዔማት አክባርን ሰበት ቲ፡ ምንለ ታጅር አፍካርኩም ሕኩካምን እግል ተህሉ ሰእዮቼ ቲ” ቤለ።

(ከሊመት ወዚር የማኔ እት ገጽ 2 ህሌት እኩም)





ኤሪትሮፖሊስ ሰር ማራቶን ሊዝቦን ሰነት 2018 ይሐምቀት

እትዮም 11 ማርስ ለገብአ ጅግረ ሰር ማራቶን EDP Lisbon Half Marathon ምን ኤሪትሮፖሊስ ኦትሌት ዮውሆንስ ገብሬገርጊስ 2ይ ክም ፈግረ መሕበር ኦትሌቲክስ ዐለም እተ አፍገረሮ ሐብሬ አፍሀመ። እተ ጅግረ ሹሩክ ለዐለ መልክ ሰር መራቶን ዐለም ላቱ ኦትሌት ዘርእሰናይ ታደሴ እግል ልትዐወት እቱ ክም ቀድር ናይ ብዝሓም ሰብ መቅደረት ኦትሌቲክስ ጌማም ህዩብ ምንመ ዐለ። ኦትሌት ዘርእሰናይ ታደሴ ላኪን ፅምር አግሀመ እቡ መሰለኒ። እግል ልትዐወት ኢኮን እተ ናይ ጃንዘት ደረጃት በሀለት እተ ሰልፋዮም ለሰለሰመ እግል ልእቱ ኢቀድረ።

ወላዊል ብዞሕ ለዐለ እቱ ድዋር እቱ ለገብአ ጅግረ። እት

ሰልፍ ለዐለው 12 ኦትሌታት እግል ጅግረ እብ ምትሐት 61 ደቂቀት ለአተሙሙ እት ህለው። እተ ጅግረ ለትዐወት ወድ ኬንዮ ኦትሌት ኤሪክ ኪፕታይኑ እብ ሳዐት ወ5 ካልኢት ልትዐወት እቱ እት ህለ። እት ናይ ለንደን መራቶን እግል ልሻርክ መቅደረት ክምቡ ለትሸረሐ ኦትሌት ዮውሆንስ እብ 11 ካልኢት እንዴ ትበደረ 2ይ ፈግረ።

እሊ እብ ኦትሌት ዮውሆንስ ሰጁል ለህለ ወክድ ለሐሰ ወክድ ምነ ቀደም እለ ሱጁሉ ለዐለ እንዴ ትበህለ ጽቡጥ እግሉ ህለ።

ብዕድ ወድ ኬንዮ ላቱ ኦትሌት ሞሪስ ሙኔኔ እብ ሳዐት ወ17 ካልኢት 3ይ ፈግር እት ህለ። 4ይት ዐውቱ እሊ ጅግረ እሊ እግል

ልሰጅል ሰታቱ እት እዴሁ ለበርደ እቱ ዘርእሰናይ ታደሴ ህዩ እብ ሳዐት ወ29 ካልኢት እንዴ ተክከረ 4ይ ፈግረ ወምን መስረሕ ጀዋእዝ ፊመ። ዘርእሰናይ ናይ ሰር ማራቶን መልክ እግል ልግበእ ለቀድረ እት ሰነት 2010 እብ 58 ደቂቀት ወ23 ካልኢት ጅግረሁ ሰበት ኦትመማቱ አሰክ እለ ህዩ እግል እሊ ወክድ እሊ ለልኦትሓይሰ ኦትሌት ርኩብ ሰበት ይህለ እቡ ልትሰሚ ለህለ።

እትሊ ጅግረ እሊ ሹሩክ ለዐለ ኦትሌት ሳምኤል ጸጋይ 2:02:8 ዘበን እንዴ ሰጅለ 18ይት ደረጃት ጸብጠ።

እግል 28ይት ዶሉ ገብእ ለህለ ጅግረ ሰር መራቶን ሊዝቦን እብ መሕበር ኦትሌቲክስ ዐለም ናይ ደሀብ ደረጃት ለቡ ጅግራ ቱ።

ፍሕሰ መቅደረት ገሮብ ሕካም ኩረት እግር ገብእ

ለጅነት ተሕኪም ፈደሬሽን ኩረት እግር ኤሪትሮፖሊስ ፍሕሳት መቅደረት ገሮብ ሕካም ኩረት እግር አቃሊም ለታይን ወራታት እት ስታድዩም አስመረ ኦትጋዩሰ።

እሊ እት ሰነብት ለገብአ መርመረ ፈተሾት መቅደረት ገሮብ። ምን 5 ለአቃሊም ለመጸው 50 ሕካም ወሴድዮቶም እግሎም ለገብአ እት ገብእ። ምን አቃሊም ግብለት በሐር ቀዩሕ እግል ልሕደሮ ሰአዩት ጋብኦት እቶም ለዐለት ሕካም ወሴድዮቶም እብ ሰብብ ቱክኒን እግል ልሕደሮ ክም ኢቀድረው ተአመረ።

እብሊ ምነ ሻረከው 50 ሕካም ወሴድዮት ሕካም ኩረት እግር ለበዝሐው እግል መርመረ እብ ዐውቱ ለአተሙሙ እት ህለው።

ክልኦት ሕካም ወክልኦት ሴድዮት ሕካም ሌጠ እግል ልሕለፎ እቱ ኢቀድረው።

ኢንተርናሽናል ሕካም ወሴድዮቶም እትለ ዕለት እለ መርመረ እግል ሊደው በርናምጅ ጽቡጥ እግሎም ምንመ ዐለ። ለበዝሐው እድንያይ ጅግራታት እግል ልሕከም እበ መጽኦቶም ዐዘማት እግል ሰፈር ሰበት ትዳለው። ምስለ እብ ገበይ ሕኪም እጃዝት ህዩባም ለዐለው እንዴ ጀምዐክ እግል ዮም 25 ማርስ ለታርፎም ህለ መርመረ እግል ሊደው በርናምጅ ጽቡጥ እግሎም ክም ህለ ትአመረ።

መዋመጦር እሊ። ለጅነት ተሕኪም ፈደሬሽን ኩረት እግር ኤሪትሮፖሊስ እግል ክሎም እሊ

መርመረ እሊ ለወደው ሕካም ለአሻረክ እጅትመዕ እንዴ ወደ ዕሙማይ መምሬሕ ሸቅል ለጅነት ተሕኪም ህበዮም።

እት አቃሊም ለልትረከቦ ሕካም እሊ መምሬሕ እሊ እግል መንፈዐቶም ክምቱ እንዴ አመረው እግል ልተለው ክምቱ እንዴ ወደሐው። እት ገሌ አቃሊም ለልትርኤ ምን ኣዳብ ወቀውኒን ርያደት በረ ላቱ ዛባጥ ሕካም ወዕዩር እት ሕካም እብ ትሉሉይ ሳድፍ ለህለ አከይ ለመድ ሰበት ገብኦ። እብ ሰብብ እሊ ህዩ እት ገሌ ሕካም አሰክ እት ገሮብም ነቃስ ለሰብብ ኦሕዳስ እት እንቱ ሰጁል ሰበት ህለ። ክኢኒ ጠባይዕ ለቡ መተልህያይ ለሰይሕ ምስዳራት እግል ልትነሰእ እቱ ትላከው።

ሮናልዶ ምስል ፈሪቁ እግል ልጽነሕ ቱ ትበህለ

እብ ሰብብ ሕዲነ ማህዩቱ ክምስልሁመ እብ ትሉሉይ ገብእ እቱ ለዐለ ሸክዋት ኢደፍዕ ደራይብ ምን ፈሪቅ ርያል ማድሪድ እግል ልፍገር ክምቱ ልትሐበር ለዐለ ሮናልዶ ምስል ፈሪቁ አሰክ ሰነት 2021 ለተአጸንሐ መፋህመት እግል ልፈርም ክምቱ ልትሸረሕ ህለ።

እተ ሐልፈ አውካድ መቅደረት ትልህያሁ ሕውንት ለዐለት ሕሩይ መተልህያይ ዐለም ላቱ ሮናልዶ። እብ ትሉሉይ እብ ፈሪቁ ገብእ እግሉ



ለዐለ ቀ ል

ወሰኑት ማህዩት እግል ልትመም እግሉ ቃደር ሰበት ይዐለ መቅደረቱ ለሐወነት ወሰአዩት ባትክ ለዐለ።

አዜ ላኪን መቅደረቱ እንዴ አተረደ እግል ፈሪቁ ወርሐ አግዋል እት ሰጅል። እብሊ ህዩ ፈሪቁ ምን ግረ እንዴ ዐረ። እተ ሳልፋዮም ለሰለስ እግል ለአምጽኡ ቃድር ሰበት ህለ። ወእትሊ አያም ቅሩብ ለወደዩን 12 ትልህዩ 17 ጎል እግል ልኦቱ ሰበት ቀድረ። መስኡል ፈሪቅ ርያል-ማድሪድ ፍሎሬንቲኖ ፔሬዝ ጠላብ ሮናልዶ እግል ለኦትምሞ ዱሉያም ክም ህለው እንዴ አትአመረ። እተ ቀደም እለ ነስኦ ለዐለ ማህዩት ሰነቱ። 28 ሚልዮን ዶላር ለትበጽሕ 7 ሚልዮን እግል ልወሰኑ እግሉ ክምቱ ሕቡር ህለ።

ማህዩት ሮናልዶ ምተሐት መጃግረቱ ላቶም ሚሲ ወኔይማር ጋብኦት ሰበት ዐለት ቱ። ክል ዶል ጠርዕ እበ ለጸንሐ።

እለ መፋህመት እለ እግል መደርብለ ፈሪቅ ላቱ ዚኔዲን ዚዳንመ ምነ ህለ እተ ዘንገት እግል ትባልሐ ወሀልዮቱ እተ ፈሪቅ እግል ለአክድ ለትሰድዩ ትመስል።

እተ ሐልፈ ወክድ ዚነዲን ዚዳን ሮናልዶ ምን ብዕደት ፕላኔት ለመጸ መተልህያይቱ። ህቱ ከፎ ክም ልተልሄ ወመቅደረቱ ክም ጠውር ለአምር ብህሉ ዐለ።

እሊ ክኢን እት ህለ ምን በርስ እብ ቅያስ ዐውል መተልህዮት እዲን ለሰብረ ማል እቡ እት ፈሪቅ ፒኤስጂ ለትዘበ ኔይማር እተ ፈሪቅ ሰነብት ሰበት ሰኢን ቀደም እት ካሰ ዐለም ሩሰዩ ሰነት 2018 ልትዐዴ። እት ፈሪቅ ርያል ማድሪድ እግል ልትዐዴ ለሐዜ ክም ህለ ወኦቡሁ እግል ልትወሰጥ እግሉ ክም ጠልበ ትሸረሐ።

ናትናኤት ብርሃኔ ለሐሰ መተልህያይ ፈሪቅ ዳይመንሽ ዳተ



ምነ እት ጅግረ ባሪስ-ኒስ ለሻረከው አንፋር ፈሪቅ ዳይመንሽ ዳተ ለሐሰት ፍገሪት ለአምጸ ነፈረለ ፈሪቅ ወሕሩይ ጅግረ ዐጀላት አፍሪቅ ላቱ ናትናኤል ብርሃኔ እት ክልኤ መርሐለት ፍገሪት ሰኔት ሰጁል ዐለ። ለሐሰት ላኪን እተ እት ናይ ደንገበ መርሐለትለ ጅግረ ለአርአዩ መቅደረት ወለ ረክበዩ 34ይ ደረጃት ዐለት። ናትናኤል እለ ደረጃት እለ እግል ልርኩብ ምነ አወላይ ለፈግረ ኮፊ ማርክ እብ 37 ደቂቀት ወ50 ካልኢት ምን ተክከራቱ።

እብ ደረጃት ፍረቅ እተ ገብኦ ጅግረ ፈሪቅ አልበሐሬን ምርያድ 1ይ ፈግር እት ህለ ፈሪቅ አስታና 2ይ ወሳልሳይ ፈሪቅ ዳይመንሽን ዳተ እግል አፍሪቅ እንዴ ወከለ ለትጃገረ ፈሪቅ ፈግረ።

አርሰን ዌንገር አሰክ እለ ኢቀሰኑ

ሙስተፈ ኦክምያን ወሚክታርያን እበ ሰጅለው አግዋል ፈሪቅ አርሰናል 3 እብ 0 እግል ፈሪቅ ዋት ፎርድ ምንመ ቀልቡ። ወእበ ፍገሪት እት ፕሪመርሊግ እንግሊዝ ሳድፋ ለዐለ ቅልብ ምኑ እግል ለአተንፍስ ምንመ ቀድረ። አሰክ እለ ለእት ፍንጌ መሰጅዐትለ ፈሪቅ ወመደርቢኑ ለህለ ክላፍ እግል ልስኩብ ኢቀድረ።


ፈሪቅ አርሰናል እብለን ለሐልፈተነ ሰንበት ዐባይ ለከሰበዩን



ሰለስ ንቅጠት እንዴ ትሰደ ጀምዕ ንቃጡ እት 48 ንቅጠት ምንመ ወቀለዩ ምነ ዐለ እተ ደረጃት ኩስኩስ እግል ሊበል ኢቀድረ። እብሊ ህዩ መሰጅዒት “አርሰን ዌንገር ምን አርሰናል ፍገር ሹክረን እግል ከደምካሁ ሰኖታት” እት ልብሎ ሰኩብ ካልኣሙ ሰበት ህለው። መደርብለ ፈሪቅ አወላይ ስታቱ ፈሪቁ ምን ገበይ በደ እት ገበይ ዐውቱ እንዴ አመርበ ለእት ረኢሱ እብ መሰጅዒንለ ፈሪቅ ተዐሰስ ለህሌት ጌመት በደ እግል ልገልጽኦ ሰቱት ክም ህለ እተ ግራለ ጅግረ ለወደዩ ሸፊሕ ሰሕፊ ሕቡር ህለ ዌንገር።

ብዞሕ መኖብር ስታድዮም ኢማሬትስ እብ ብራቁ ለትረኢ እተ ጅግረ አርሰናል ድድ ዋትፎርድ ፒተር ቼክ ናይ አርሰናል ማልዮት እንዴ ለብስ ለትረኢ እተ ወናይ ሰልፍ ሪገሌ ለአድሐነ እተ ትልህዩ እንዴ ገብኦት ሰጅልት ህሌት።

አርሰን ዌንገር ዮም ዓመት ናይ ደንገበ ሰነቱ ምስል አርሰናል ለጸንሕ እተ ሰነት እግል ትግበእ ክም ትቀድር ብዝሓም ሰብ መቅደረት ርያደት ለሀበው ጌማም ህለ። እግልሚ ፈሪቅ አርሰናል ሰኔ ልሄርር እንዴ ጸንሐ እትሊ ናይ ደንግብ ጅግራታት ረኢሉ ተሐት ደንን ሰበት ህላቱ።



ሽዑብ ወለመዱ



ዝቤ ቱ። ሰበት እሊ ህዩ አዩ ነፈር ወለቱ እግል ለአትሀዴ ዶል ልብል እመር ስመይ ሰበት አለቡ ክም ምራዱ ሰምዮ፡ ሐቆ ዋፈቀው ሰርለ ዐውል እብ ግሩሽ አቡሀ ልትከቡቱ እት ሀላ፡ ለሰር ህዩ እብ ዐፍሽ ወሰርጎ ገብእ በሀለትቱ። ሐቆ ማል ትካለሰ ዓደት ህዳይ አለቡ መርዓዊ እሲቱ ነስእ ወለ ህዳይ ተምም።

□ ሽዑብ አይማረ፡ እት ምግብ አድብር አንዴዝ ለልትረከብ አቅሊም አልቲብላኖ ነብር። ጅንሱ ምን ህኑድ ቀይሒት ላቱ ሽዑብ አይማረ፡ ሐድ ሚልዮን ክም ገብእ ልትዋገም። እሊ ሽዑብ እሊ እት ምግብ ድወል ግብለት አሚርከ ዓዳቱ ወለመዱ እንዴ አለአበዴ ነብር ሀለ።

እሊ ሽዑብ ብዙሕ ለለአትፈክር ለመድ ምንምቡ ምን ክሉ ለተአትፈክር ላኪን፡ ምሴት አተላተ ወርቦ ምን ጅኑን ሰበት ፈርህ ላሊ እብ ግዲደ አሰክብ ምን ገብአቱ። እትለን ክልኤ አምዕል ጅኑን ምስል ውድቀት ጸሓይ ክም ልትሐረኮ ሰበት ለአምኖ ቱ። እብሊ ህዩ እት ሰክቦ ለጅኑን እግል ኢልምጽምም ሰበት ፈርህ እትለን ክልኤ አምዕል እበ ጅኑን እግል ኢልትነስእ ሰበት ፈርህ ቀመት ኢነስኤ።

ለጅኑን እግል ጣረዞት እንዴ ቤለው ህዩ፡ ለለአፈርህ ልባሴ ናይ ገጽ ማስኪራት ወላሊ እብ ሪመ ሰጅይር ወክምረት እት ሰቱ

ወለለአፈርህ ሕላይ እት ለሐሉ ልትመዮው።

ሽዑብ አይመረ፡ ተናን ሰጃር እግል ጅኑን ክም ጣርዝ ሰበት ለአምኖ ክሎም ሰጃይር እምበል አሰፍ ሰቱ። ለምሴት እሊ ልዳሌ ድራር ህዩ ለኢበልዕው ሕበዝ ገብእ እት ሀላ፡ እግል ሕራብለ ጅኑን ልዳሌ።

□ ቡንዱ ለትትበሀል ቀቢለት፡ እት ህንድ፡ አቅሊም አሪሰየ ለትነብር ቀቢለት ተ። እትለ ቀቢለት እሊ ህዩ ክሉ አምዕላይ ወራታት እብ አንሳይ ልትጋየሱ። ውላድ ተብዕን ህዩ አምዕል እብ ግዲደ እት ከደን እት ልትፋግግ ልውዕሎ ወእት ለዐይሮ ገርወ እንዴ ቀትለው ለዐይር። እትለ ቀቢለት እሊ ሞት ዓድየት ክብትት ኢኮን ፡ ለክም ናይ ሐበን ሞት ልርእወ ህዩ ዲብ ሐርብ ወበአሰ ዶል መይቶቱ።

□ ባበው ለትትበሀል ቀቢለት ህዩ እት ግብለት አውሰትራልየ ለትነብር ቀቢለትተ። እትለ ቀቢለት ፍንቲት ሓጅት ህሌት ምንገብእ ፡ ህዳይቱ። ህዳይ አክል ሐድ ክም

እብ ሰደፍ ቱ ገብእ?

እት ሰነት 198፡ ዊልያም ሂል ለልትበሀል ወድ አምሪክ ላቱ ሐኪም አጀኒት ሸቅሉ እንዴ አትመመ አስክ ቤቱ እግል ልዲር እት ልትግብሉ፡ ሓድሰ ዐረብየት ለሳደፈዩ ጅናሆም ለጳብጣም ዋልዴን መጸወ፡ ዊልያም ሳዐት ዔረቱ ታመት ምንመ ዐለት፡ ለጅነ እንዴ አሰዴ እግል ሊጊሰ ደሚሩ ኢተለዩ። እብሊ ሰበብ እሊ አርወሐትለ ጅነ እግል ለአንግፍ ለዐል ወተሐት ቤላ። እብሊ ህዩ እግል ውጽዕ ለዐለ ወድ ክልኤ ሰነት ጅኔታይ ሳይታት ብዙሕ ለነሰአት ዕውትት ዐመልየት ወደ እግሉ። ሐለተ ጅነ ምን ቅሩብ እግል ልታብዕ እንዴ ቤለ ህዩ እት ዕያደት ትመዮ ወለጅነ ክም

ትሸበህ ምስል ዋልዴንለ ጅነ እብ ሐምዴ እንዴ ትፈንተ አስክ ቤቱ ትበገሰ። እምለ ጅነ ህዩ እብ ውዳይለ ዶክቶር ርይሐት እት እንተ ‘ወልዩ ክም ዐቡ እብሊ ለወዴካሁ እግሉ እንሳንዮት ለለአርኤ ፈክ ክም ደሐነ እግል እዳግም እግሉቱ’ ቱሉ።

እት 2011 ሐቆ 30 ሰነት፡ ዶ/ር ዊልያም እብ መኪኑቱ ምስል ዕጩት ሰበት ትዳገሽ፡ ህቱ እት ቀበተ እት ቅፋል እት እንቱ ለዐረብየ እግል ትንደድ አንበተት። እበ ገበይ ለሐልፍ ለዐለ ሻብ ላኪን ክምሰለ ብዕዳም እግል ለአተቅብል ይሐዘ፡ እብሊ ህዩ እግል ርሐ እንዴ ኢልብል እት ለትነድድ ዐለት ዐረብየት

□ እት ድባዕ አማዞን ለነብሮ ቀባይል ተሳዳ፡ ‘ሐዋን መሳኒት አዳምቶም’ ምነ ልብል አፍካር ለገብእ ሐዋን ኢልትነዐው። ምን ጅንስ ሰገ ህዩ ናይ ዓሰ ሌጠ በልዮ። ለሰበብ ህዩ ዐሰ መሰኒ አዳም ኢኮን ሰበት ልብሎቱ።

□ እብ ዓጭሞታት ሰሰዮት እት ማደጋሰካር ሰነት- ሰነት ለገብእ ዓዳትቱ። ክሎም ኔብረተ ደዋይሕ ዓጭሞታት ለሞተው አዳምም እንዴ ሐንፈለው፡ እበ ዓጭሞታት ከበሮ ሐምሕም ዘብጦ ወሰሰዮ በሀለትቱ። እሊ አምዕል እሊ ህዩ ለማይታም እብ መንፈስ ምስል አቃርጦም ክም ልትሃጀኮ ወልትራክቦ ሰበት ለአምኖ ምስል ዓጭሞታት ልትመወኖ ወልትሃጀኮ።

□ እት ግብለት ኮርየ ዐምሳት እት ቤት እመ ትወልድ ወእግል ሐድ 21 ዮም ምንቤት እመ ኢትፈግር። እግል ልዕዶደ ለመጽእ ዔደት ህዩ “አስኪሃን” ለልትበሀል ምን ሩዝ ወፋሉልየት ለትትሸቄ ጨፎት ትትቀደም

ምን ዳዩሪ ሚ ኢበለኪ?

ትንፋሰዬ ኢበልኪ ለእግሉ አተንፍሰ መቤቼ ኢበለኪ ለእት አረቅቅ ውሓፍሰ ንሳልዬ ኢበል ለእቡ ሐብር ወእወስፍ አው ቃራቼ ኢበለኪ ለእግሉ እበርብር ወዐጽፍ ትንክርመ ተአስትህለኪ ለከረም ወሐጋይ ኢነጽፍ።

እንቲ ዔማት ሐጠርዬ ክሉ ተአስትህለ ክሉ እት ወዲ ሐቱ ኢወዴኮ ትብሊ ፈክ ተሀይቢ እንዴ ኢኮን ፈክ ኢትጸበሪ እግል ሀለዮት ብዕዳም ትነብሪ እንቲ እንዴ ትበሊ ሚ ኢበለኪ እንቲ ሚተአስትህለ።

ሕርመት ኢበለኪ ለረሕመተ ቅዝር መከሀላት ኢበለኪ እንቲ ደብር ሰብር መሰአየት ኢበለኪ ሰአየት ለዲመ ኢተዐብር አው ቀል ኢበለኪ ለንሳለ ኢትባድል አው ጼውረይት ኢበልኪ እሊ ጣፍሕ ምድር ዐለምመ ምን እብለኪ ምንዲ ኢትንእሽ ዲብኪ እኪ ተአስትህለ

እም እግል ኢበለኪቱ እምተ ለእሊ ክሉ ትጸውር አይወ ስምኪ እምተ ለመሳጢር ዐለም ትሰትር እብ አማን እም እንቲ ለእግል ሐያት ብዕዳም ሐያተ ትፈንጥር!

Moዳ

እግሎም። እት ቦሊብዩ ላኪን ዐመሲ ቀደም ወሊደን መራዐየት ሐቆ ረክበዩ መይተ ላልብል ለመድ ሰበት ቦም፡ አስክ አምዕል ወሊደ ምን ተዐብ ኢለዓርፈ። ወቅት ወሊደን ዶል ተምም ህዩ እት ዐደን እንዴ ጌሰየ ወልደ። ለልትወለድ ጅነ ህዩ ክም ዐበ መትሃግያይ ወህሉፍ እግል ኢልግበእ እንዴ ትብህለ እትቡ በደል እብ ሰኪን ብቅዕት እብ ሰብብር ድዋን ቀሩጩ።

□ እት ቱርኪ መርዓዊ እት ዓደት ህዳዩ እብ ዐድ ወለት እብ ጨወት ሐስመት ለጋብእ ፍጃን

ቀድሙ እግሉ፡ ለመርዓዊ ዓቅል ወሳብር ክምቱ እግል ለአርኤ ህዩ እብ ተበሰም እግል ልገርደዐ ዓዳቶም ወለመዶም ቀሰቡ። መስርዩንመ እብ እንክርም ፍጃን ናቅስ ስትየት ሰህ ሰበት ኢልብሎም፡ ዐድ ሕጻን ሞላድወኪር እግል ልሕዘው እት ዐድ ወለት ዶል ገይሶ ለእግለ ልተምነው ሀለው ወለት ቡን ተአፈልሕ እግሎም ወእብ ብጣሪ ድንን እንዴ ትቤ ተአስትዮምተ። ለፈጃጃን ለክዩል ትፈናጨለ ምነ ምንገብእ፡ ላበት ሰበት ኢትትበሀል እብ መደጋግ ትማጥዮም።



ፍንቲት ሰወር ርክብ

